

Э.И. Полякова



**КОМИ
КЫВ
2**



текст
сёрникузя
кывтэчас
кыв

вөр

вөралём

вөралысь

өтвужъя кывъяс



ГРАММАТИКА
ГРЕЗД



КЫВБЕРД

кутшөм?



КАДАКЫВ

мый
керө?

мый
вөчө?



ЭМАКЫВ

кодi? мый?



КЫВБӨР

вылын

улын

дорын

сайын

бокын


Э. И. ПОЛЯКОВА

КОМИ КЫВ

МӖД КЛАССЛЫ ВЕЛӖДЧАН НЕБӖГ



ВынсьӖдӓс Коми Республикаса
йӖзӖс велӖдан министерство












Сыктывкар
2009

81.2 Коми-9
П 54

Велӧдчан небӧгсӧ дасьтӧма Коми Республикаса образование
сӧвмӧдан да кадрыяс дасьтан институтын

Велӧдчан небӧгсӧ серпасалисны Г.Н.Шарипков, И.А.Авилова

ОТСАСЯН ПАСЪЯС:

-  – урок тема
-  – мый тӧдмалам да мыйӧ велалам
-  – кывлӧн гусяторъяс
-  – босьт тӧд вылӧ гижанногсӧ
-  – кывлӧн вежӧртас
-  – гортса удж
-  – вӧч тадзи
-  – ёрта-ёрткӧд уджалӧм
-  – проектнӧй удж

ISBN 978-5-91669-021-7

© Полякова Э. И., 2009
© Шарипков Г. Н., оформление, 2009
© Авилова И. А., оформление, 2009
© ООО «Анбур», 2009



Дона челядь!

Чолөмала тiянөс выль велөдчан воөн!
Тайө небөгыс отсалас тiянлы восьлавны чужан
кыв ордымөд. Öльөксанкөд да Настуккөд тi
веськаланныд Грамматика нима грездө. Танi
стрөйба-оланiныс да олысьясыс аслыспөлөсөсь.
Грездса олысьяскөд аддзысьлигөн тi велалан-
ныд колана ногөн сёрнитны да правилөяс серти
гижны, босьтанныд төд вылө кывъяслысь
гижанногсө, нөшта унджык төдмаланныд
матигөгөрсä олөм йылысь.

Грамматика грездас медся пыдди пуктана
олысьыс Грамматик пөль. Сийө нуөдас тiянөс
коми кыв ордымөд да төдмөдас кывлөн
гусяторъясөн. Мича грездын тi вөчанныд
Грамматик пөльлысь уджъяссө, велөдчанныд
гижны изложениеяс да сочинениеяс. Сиа
тiянлы, дона челядь, быд бурсө Грамматика
грездын коми кывйысь выль төдөмлун бось-
төмын да кужөмлун сөвмөдөмын.

Эльвира Ивановна



1. Лыдды велöдысьлысь висьталöмсö.

Видза оланныд, дона челяды!

Ме чолöмала тiянöс мöд классö «воськовтö-мөн». Мöд классö вуджисны и тiян бур тöдсаяс: Öльöксан, Настук да налөн ёртъясыс. Коми кыв урокъяс вылын тi велаланныд бура гижны, сёрнитны, тöдмаланныд чужан кывлысь гусятортъяс.



Сёрни. Өтка да морта-морт сёрни.

? Мый шуоны өтка сёрниөн?

? Мый шуоны морта-морт сёрниөн?



2. Лыдды. Уськөд төд вылад мойдыслысь нимсө. Коді висьталө?

– Аттө, кутшөм пакөсьт вөчис меным Көчылд. Став пасьөс косявліс да йөз водзын менө янөдіс. Мый шуасны бур йөзыс, кор кывсяс, мый Ручлысь дона пасьсө Көч косявлөма?

◆ Помав.

Тэ лыддин мойдса геройлысь
висьталомсö. Тайö ... сёрни.



Öти мортлөн висьталом –
тайö öтка сёрни.



Ёртъяс сёрнитöны öта-мöдныскöд.
Кык либö некымын мортлөн сёрнитöм –
тайö морта-морт сёрни.



3. Висьтав, кыдзи тэ шойччин гожöмнас.



Гижöда да гижтöм сёрни.

? *Кутшöм сёрни шуöны гижöдаөн?*

? *Кутшöм сёрни шуöны гижтöмөн?*

4. Лыдды. Висьтав, мый тöдмалін сёрни йы-
лысь.


Öта-мöдöс ми гөгөрвоам сёрни отсөгөн. Сёр-
нитöм, висьталом – тайö вомгора, гижтöм сёрни.
Гижтöм сёрнисö ми кылам.

Сёрни позьö гижны, петкөдлыны шыпасъяс
отсөгөн. Гижöда сёрнитö ми вермам лыддыны.

Важөн гижлöмаось пасъясөн. Öнi позьö казьяв-
ны туй выв пасъяс, рöдвуж пасъяс. Но тайö абу
сёрни пасъяс.

◆ Висьтав, кор тэ вöдитчан гижöда да гижтöм
сёрниөн.

◆ Тöдмась коми рöдвуж пасъясөн.



5. Лыдды да гөгөрвоод, мыйла тадзи шуöны.
Гиж сёрникузясö.

Морттö позьö донъявны сёрни сертиыс.

◆ Висьтав, кор вöдитчам тайö шусьöгнас.



6. Лыдды сёрникузьяссö да гиж лöсялана шы-
пасъяс содталöмөн.

Йöз с...рнитöны уна с...кас кывйөн. Быд морт-
лөн эм аслас чужан кыв. Коми йöзлөн чужан кыв-
йыс – коми кыв.



Кыв, сёрникузя да сёрни.

?

*Мыйён ми вөдитчам ас сёрниын, медым вись-
тавны кутшөмкө мөвп?*

7. Лыдды слогъяссө, артмөд кывъяс да гиж.

ри ту ка ра



Слогъясысь артмө кыв.

8. Артмөд сёрникузя дзугөм кывъясысь да гиж.

лэбёны, лунвылө, арын, турияс

◆ Мый колө вөчны, мед кывъясысь артмис сёр-
никузя?



Кывъясысь артмө сёрникузя. Сёрникузяын
кывъяс йитчөны өта-мөдыскөд.

9. Лыдды гижөдсө.

Со и ар. Пуяс вылын вижөдісны коръяс. Ывла-
ас көдздөдіс. Шоныд лунвылө мөдөдчисны турияс.

◆ Позьö-ö гижöдсö шуны сёрниён?

◆ Лöсьöд серпас серти куим сёрникузя да по-
мав гижöдсö.



☺☺ 10. Лыдды баты-пиалысь сёрнисö.

– Батьö, тайö нö кутшöм лэбачьяс?

– Тайö, пиук, турияс мөдöдчöмаöсь лунвылö, шоньд саридз дорö. Со кутшöм вожа везйөн мичаа лэбöны. Юрнуöдысьыс медводзын. Мукöд туриыс öтар-мöдарас чикыш бöж моз вожалöны-дöлалöны.

Висьт, юалöм, вочавидзöм – тайö сёрни.

Сёрни отсöгөн йöз гөгөрвоöны öта-мöдсö.

Миян сёрни артмö сёрникузясысь, сёрни-
кузяс – кывъясысь.



11. Лыдды кывбурсö колана ногөн. Тöдмав сёрникузя лыдсö да гиж шыпасъяс содталöмөн.

Шонд... мыйкö дышмис,

Чинт...с ассьыс öд.

Гожся моз оз ышмы,

Ыджыд жар оз сет.

М.Лебедев



Сёрникузя.

? *Мыйөн торъялöны кыв да сёрникузя?*



12. Лыдды гижөдъяссө да инды сёрникузяяс.

Челядь ветлісны вөрө.

чөскыд вотос

Челядь босьтісны чуманъяс да мөдөдчисны вөрө.

вотісны чуманө

Найө вотісны чөскыд вотөстө чуман тыр.

◆ Мый йылысь висътавсьө сёрникузяясас?

13. Лыдды. Орччөд кывъяс да сёрникузя.
Мыйон торъялөны кыв да сёрникузя?

вотос, миян, озыр, парма	Миян парма озыр вотосон.
-----------------------------	-----------------------------

Өта-мөдыскөд йитчөм некымын кыв – тайө сёрникузя.

Сёрникузяын кывъяс гижсьөны торйон.

Сёрникузяын медводдза кывйыс гижсьө ыджыд шыпассянь.

Сёрникузяон висътавсьө помассьом мөвп.

87



14. Лөсьөд сетом кывъясысь нель сёрникузя да гиж.

вөрө, Ваня, ветліс, пöльыскөд

веськаліс, зонка, вотöсаинö
чуман, вотіс, сійö, зіля, тыр, чöd
чöсмöдліс, йöлөн, ставнысö, талун, вотöса,
Ваня



Текст. Текстлөн тема. Юрним.

15. Лыдды гижödъяссö да орчöd найöс. Инды кывъяс, сёрникузяяс да текст.

Вöрын, вотны, гоҗся, уна, тшак.

Челядь вотöны тшак.
Кыдз пу вылысь гылаліс кор.
Ю вевттьысис йиön.

Öти гоҗся лунö Мишук батыскöd ветліс-ны тшакла. Найö вотісны чуман тыр дона гоб. Рытнас ставön чöсмасисны жаритöм тшакön.

16. Лыдды 15-öd уджысь текстсö.

◆ Мый йылысь висътавсьö текстас?

◆ Кутшöм темакöd йитчöмаöсь текстас сёрникузяяс?



Текстлөн эм тема. Быд текстын мый либө код йылысь кӧ висьтавсьӧ.



17. Лыдды. Мӧвпышт, позьӧ-ӧ лыддьӧмторсӧ шуны текстӧн. Инды текстыслысь темасӧ: мый йылысь висьтавсьӧ тайӧ гижӧдас?

Гожся лунӧ Ваня да Дима ветлісны ягӧ. Найӧ вотисны тшак да пуксисны шойччыны пожом улӧ.

Пу бокысь зонкаяс казялісны кӧчпиӧс. Кӧчильыд оз тӧд, кодарӧ пышйыны.

Кӧчпиыд казяліс челядьӧс да ӧдйӧ котӧртис вӧрӧ.

◆ Бӧрйы текстлы лӧсялана юрним.

Тшак вотӧм. Ягын. Кӧчпикӧд аддзысьлӧм.



Текст позьӧ юрнимавны. Юрним серти позьӧ тӧдмавны, мый йылысь висьтавсьӧ текстас.

Текстӧн шусьӧ висьт, мойд, кывбур, нӧдкыв, пудъясянкыв.



18. Лыдды. Висьтав, позьӧ-ӧ тайӧ гижӧдсӧ шуны текстӧн?

Сиктсаянь неылын эм гулыд яг. Зонкалы шедіс немын гырысь ёкыш. Тані быдмёны кузь пожомъяс. Гожся лунё челядь купайтчисны вадорын. Яг бокті визувтё тэрыб шор. Уна вотчысьёс юктөдліс тайё шорыс аслас чөскыд көра ванас!

◆ Корсь «Ягын» тема серти нель сёрникузя да гиж.



Гулыд – гежөд пуяса, абу сук вөр.



Текстлөн шөр мөвп. Текстлөн тэчас.

19. Лыдды текстсё. Инды сылысь темасё да юрнимав. Гиж небыд паса кывъяссё.

Өти гожся лунё ми батькөд ветлім пес керавны. Бат...ё пилитчис да поткөдчис. Ме тэчи поткөдлөм пессё чипасё.

Вөрысь гортё мунігөн коз пу улысь батьё казяліс көчөс. Сылөн лапаыс вөлөмкё доймёма. Ми батькөд босьтім ранитчөм пемөссё гортё. Некрымын лун ме лечиті көчил...ыдлысь вис...ысь коксё. Бурдыштөм бөрын сійё тшөкыда мөдіс видзөдны өшин...ё.

Ми батькөд вайим бурдөм көчөс вөрө да лэдзим. Медым котралё парма-вөрас!



◆ Мый тэ верман висътавны зонка йылысь? Кызди донъялан сылысь вöчöмторсö? Инды висътылысь шөр мөвпсö.



Текстлөн эм медшөр мөвп. Быд текст дасьтöны кутшöмкö мөгөн.
Текст лыддигөн колö гөгөрвоны сылысь темасö да шөр мөвпсö.



Кызди тэчсьö текст?

20. Лыдды висьтсö выль пöв да вочавидз юалöмъяс вылö:

- ◆ Кымын юкöнысь артмöма текст?
- ◆ Мыйсянь заводитчö висьтыс?



Текстлөн эм заводитчöм, шөр да пом.
Юкөнъяс йитчöмаöсь öта-мöдныскöд да сулалöны сьöрсьөн-бöрсьөн.
Быд юкөн гижсьö выль визьсянь.



21. Юклы гижöдсö сёрникузяс вылö да гиж.

Вöрын.

Лунтыр котшкö сизь көнкö ылын ливкйöдлö кök льöм пу улысь чепöсйис визяорда кок улын быдмö томиник веж турун вöрса шорын дзольгö кöдзыд ва.



Кывтэчас. Сёрникузя.

22. Лыдды. Гөлөсөн торйөд колана кывъяс.

Шонді.

Быд асылө петө шонді, –

Вайө гажа югыд лун,


Ставсө гөгөр бура шонтө, –

Шуда нюмөн садьмө му.

И.Торопов


23. Артмөд кывъяснас кывтэчасъяс.

Сынөд, ярьюгыд, енэж, сөстөм, шонді, лөз.



Ярьюгыд шонді – тайө кывтэчас. Кывтэчасын **шонді** кывйыс – сюрөса (главнөй), пасйыссьө **х** пасөн. **Ярьюгыд** кывйыс – йитчан.

Сёрникузя – тайө кыв либө некымын кыв. Сёрникузяөн висьтавсьө помасьөм мөвп. Сёрникузяын кывъяс йитчөны өта-мөдныс-көд вежөртас да шуанног серти.



24. Гиж куим кывтэчас. Пасйы сюрёса кывсö
х пасөн.

25. Лыдды. Инды кывтэчасъяс да сёрникузя.

меліа нюмъялö
ярьюгыд шондi
лöz енэжын

Лöz енэжын меліа
нюмъялö ярьюгыд шондi.



26. Лыдды кывбурсö. Гиж колана шыпасъяс
содталöмөн.

Шонд... судзö быдөн дорöдз!
Ставлы сійö мел... ань,
Сылөн н...мысь вощьö дзоридз,
Кисьмö вотöс, воö н...нь. *И.Торопов*



Юөртана, юалана да чуксалана сёрникузяяс.

? *Кутшөм сёрникузя сикасъяс паныдасълöны миян сёрниын?*

? *Висьталан мог серти кутшөм сёрникузяяс ов-
лöны?*

27. Лыдды гижöдсö.

Кыз пу – вöрса компас.

Вотчөм бöрын Ваня пуксис шойччыштны. Не-
ылын сулаліс кыз пу.

– Бабуш, а мыйла öтар бокыс пуыслөн паш-
кырджык, а мöдарыс этшаджык увъя? – индіс
кыз пу вылас зонка.

Ваня матыстчис кыз пу дорö да видзöдліс пу-
черсö.

– Мыйлакö и пучерыс абу öткодъ? Со öти бо-
кыс шылъыд да сöстөм. Пöльлы сямöд кульöм
вылö лöсялас. А мöд бокыс абу шылъыд.

– Кыз пуыд öд вöрса компас. Сы серти кокни
тöдмавны лунвыв да войвыв, – висьталіс внукыс-
лы бабыс.

Гортлань восьлалігөн пöч индаліс мукöд си-
кас «компасъяс» да висьталіс на йылысь.

◆ Кызди вöрын позьö тöдмавны лунвыв да вой-
выв?

◆ Кутшöм «вöрса компасъяс» йылысь висьталіс
пöчыс Ванялы?

◆ Мый йылысь юöртсьö медводдза сёрникузяас?

◆ Мый йылысь висьтавсьö мöд сёрникузяас?

◆ Лыдды сёрникузяяс, көні эм юалöм. Мый
йылысь юасис Ваня?

Сёрникузяын кө мыйкö юöртсьö, мый йы-
лысь кө висьтавсьö, помас сувтöдсьö **чут (.)**.
Висьталан мог серти тайö **юöртана** сёрникузя.

Сёрникузяын кө мыйкö юавсьö, помас сув-
тöдсьö **юалан пас (?)**. Висьталан мог серти
тайö **юалана** сёрникузя.

28. Лыдды сёрникузяяссö. Тöдмав гижöдлысь
темасö.

Парма-ягид козьналö мортыдлы ассьыс озыр-
лунсö. Тані сылөн и сёян, и ломтас. Тані сійö тыр
морöснас лолалö сöстöм сынöдсö.

Кужöмөн вöдитчöй мортыдлы козьналöм озыр-
луннас. Видзöй парматö.

◆ Аддзы сёрникузяяс, көні висьталысьыс корö,
чуксалö, тшöктö мыйкö вöчны. Лыдды найöс ко-
лана ногөн.

Эмось сёрникузяс, кӧнӧ висьталысьыс корӧ кодӧскӧ мыйкӧ вӧчны, чуксалӧ, тшӧктӧ. Тайӧ **чуксалана** сёрникузяс.

Татшӧм сёрникузя помын сувтӧдсьӧ **чут** (.).

Висьталан мог серти овлӧны **юӧртана**, **юалана** да **чуксалана** сёрникузяс.



29. Лыддзы кывбурсӧ колана ногӧн. Тӧдмав сёрникузя лыдсӧ. Гиж колана пасъяс пукталӧмӧн да шыпасъяс содталӧмӧн.

Пас...кыд да з...в мича
Миян чужан му

Велӧдчӧй т... видзны
Дзик быд шор да пу

С.Попов




Сёрникузя сикасъяс.

?

Кор сёрникузя помын колӧ пуктыны чут (.), горӧдан пас (!) да юалан пас (?) ?

30. Лыддзы колана ногӧн.

Восьлалан арся вӧрӧд. Кок улад вольсалӧма мича сера джодждӧра. Луныс сэтшӧм гажа! Кодӧ нӧ дасьтӧма му вылас мича вольӧссӧ? Тайӧ коръя пуяслӧн гылалӧм коръясыс артмӧдӧмаӧсь шемӧс-мӧдана серпассӧ.



Юөртана да чуксалана сёрникузясö позьö лыддыны да шуны сьёлöмкылöм петкöд-лöмөн. Сэки колö лыддыны горöдана шуан-ногөн, а гижигөн сёрникузя помö пуктыны горöдан пас (!).

Пасъяс отсалöны колана ногөн лыддыны сёрникузя, петкöдлыны гөлöсөн лыддыöм-торсö.



31. Гиж колана пасъяс тэчöмөн.

Зарни ар.

Заводитöны вижöдны кыз расъяс пöльыштлö кокныдик тöвру пуяс вылысь гылалöны косьмöм коръяс кутшöм мича арся вöрыс

И.Коданёв серти



Горөдана да абу горөдана сёрникузяяс.

32. Лыдды сёрникузяяссө. Мөвпышт, кутшөм сёрникузяөн позьö петкөдлыны шемөсмөм да дивуйтчөм.




Арся вöрын чөв-лөнъ. Сөмын кок улад кос кор-
йыс кышакылö. Друг öти пусянь мөдö кодкö
чеччыштис-лэбыштис. Коді нö эськö тайö? Тайö па-
ляур тай вөлöма! Ёна жö гажөдчисны уръяс тайö
арся вöрас!

◆ Висьтав, кутшөмөсь сёрникузяясыс висьта-
лан мог сертияс.

◆ Гиж бөръя кык сёрникузясö.

Сёрникузяс кӧ петкӧдлыссьӧ кутшӧмкӧ сьӧлӧмкылӧм (радлӧм, шензьӧм, повзьӧм, нимкодяссьӧм, шогсьӧм да мукӧд), лоӧ горӧданаӧн. Сёрникузя помас сувтӧдсьӧ горӧдан пас (!).


Сёрникузя, кӧнӧ абу петкӧдлӧма сьӧлӧмкылӧмсӧ, лоӧ абу горӧданаӧн.

 Шуанног серти сёрникузяс овлӧны горӧданаӧн да абу горӧданаӧн.

Арся вӧрын чӧв-лӧнь. – Тайӧ абу горӧдана сёрникузя.

Тайӧ тай паляур вӧлӧма! – Тайӧ горӧдана сёрникузя.

Ӧти гижӧдсӧ позьӧ лыддыны уна ногӧн. Быд лыддысь петкӧдлӧ ассьыс сьӧлӧмкылӧмсӧ.

 **33.** Лыдды. Артмӧд сетӧм сёрникузясысь кывбур да гиж.

Ур.

Вӧрын, коз пу йылын
Бӧжыс лышкыд, бур.

Юрыс гӧгрӧс сылӧн,
Йӧктӧ-ворсӧ ур.

В.Лыткин



Подувпас.

? Мый сійö подувпасыс?

34. Лыдды серпасъяс увсьыс сёрникузяссö.



Нывка вотö оз.



Нöрыс вылын быдмö оз.

Подувпас – сёрникузяын сюрöса юкöд. Сійö петкöдлö, код йылысь либö мый йылысь висътавсьö сёрникузяс.

Подувпас вочавидзö кодi? да мый? юалöмъяс вылö: кодi? – *нывка*, мый? – *оз*.

35. Лыдды да юрнимав гижöдсö.

Настук восьлалiс пода туйöд нöрыслань. Татысь сійö быд во оз вотлывлö.

Воис нöрыс. Нывка водзын воссис мичаысь-мича серпас. Лöсьыд жö нин, майбырöй, вöрад! Нöрыс вылын сярвидзис уна оз. Кисьмöм гырысь тусьясыс сiдзи и вöзйысьöны вомад. Настук видлiс

öти тусь. Ок, кутшөм чөскыд, юмов! Неуна чөс-
масьыштөм бөрын нывка мөдiс вотчыны.

◆ Воддза да бөръя сёрникузяясысь инды
подувпассö.

◆ Висьтысь инды горöдана сёрникузяяс да
лыдды колана ногөн.



36. Гиж, сёрникузяясысь аддзы да визьнит
подувпассö.

1. Петя кыйис чери. 2. Мамö вотiс пув. 3. Мөс
йирис турун. 4. Батьö тшупис пывсян. 5. Ур кил-
лис коль.



Юөрпас.

? *Мый сiйö юөрпасыс?*

37. Лыдды сёрнику-
зясö.

Кос кондаö таркөдö
сьöd сизь.

◆ Мый висьтавсьö сизь
йывсьыс?





**Сёрникузьяын сюрёса
да содтана юкөдъяс.**

? *Мый сійö сюрёса да содтана юкөдъясыс?*



40. Орччөд сёрникузяяссө.

Зымвидзё гоб.

Небыд нитш вылын зымвидзё гөрд гоб.

- ◆ Мый йылысь висътавсьö сёрникузяясас?
- ◆ Кутшөм кывъяс сёрникузяясас öткодьöсь?

Сёрникузяын эмось медшөр кывъяс. Найö шусьöны сюрöса юкөдъясөн да артмөдöны сёрникузя подувсö. *Зымвидзё гоб* – тайö сюрöса юкөдъяс.

41. Лыдды сёрникузяяссө да орччөд найös.

Нюмъялис ягсер.

Раскын нюмъялис выльысь петөм еджыд ягсер.


- ◆ Кутшөм сёрникузяын, сюрöса юкөдъяс кын-дзи, эмось мукөд кывъяс?
- ◆ Мыйла колöны содтөд кывъясыс?

Сюрöса юкөдъясысь öтдор, сёрникузяын вермасны лоны содтана юкөдъяс. Найö стöч-мөдöны да паськөдöны сюрöса юкөдъясыс-лысь вежөртассö.


42. Лыдды сёрникузясё.

Ягын быдмөма ыджыд гоб.

◆ Лыдды сёрникузясё схема серти.



◆ Юалөмъяс отсөгөн петкөдлы сёрникузяын кывъяслысь йитчөмсё.

 Код йылысь висътавсьё сёрникузяс? Коді пукалө? – *Пукалө сизь. Сизь* – тайё подувпас. Пасъям öти визьөн.

Сизь мый вөчө? – *Сизь пукалө. Пукалө* – тайё юөрпас. Пасъям кык визьөн. *Сизь пукалө* – тайё сюрөса юкөдъяс.

Кутшөм сизь? – *Сьöd сизь.*

Пукалө көні? – *Пукалө пожөм вылын.*

 Пожөм вылын пукалө сьöd сизь.

 43. Гиж да визьнит сюрөса юкөдъяссё.

Зэрыштөм бөрын матысса ягö петөма тшак. Водз асывнас Яков кытшовтис ягсö. Сийö вотис пес-тер тыр ягсер да еджыд гоб.

ШЫ ДА ШЫПАС



Шы да шыпас.

? Мыйон торъялөны шы да шыпас?

? Кызди пасйыссьөны сёрни шыяс гижигөн?

44. Лыдды нөдкывсө да төдмав. Гиж төдмалөм кывсө.

Ветлігас нэм чөжыс
Туйбөр чышкө бөжыс.

Ю.Попова



◆ Сьөрсьөн-бөрсьөн шуав **руч** кывйысь шыяссө.
Инды быд шы.

Торйөдөй шы да шыпас!

Миян сёрни артмө шыясысь. Сёрни шыяс ми кылам да шуам.

Гижигөн сёрни шыяс пасъям шыпасъясөн.
Шыпас – сійө гижөда сёрнилөн пас.

Шыпасъяссө ми аддзам, лыддыам да гижам.
Сёрни шыяс пасйыссьөны таdzi: **[руч']**.

Руч кывйын **[р]**, **[у]**, **[ч']** шыяс; **р**, **у**, **ч** шы-
пасъяс.

45. Видзӧдлы шы пасйӧмсӧ. Шуав шыяссӧ.

[ӧ] [к] [и] [н]	[к] [ӧ] [и] [н]
[у] [р] [ч']	[р] [у] [ч']

◆ Кутшӧм шыяс сьӧрсьӧн-бӧрсьӧн шуалӧгӧн артмӧдӧны кыв?

◆ Гӧгӧрвоӧд кывъяслысь вежӧртассӧ да гиж найӧс.



Кывйын быд шылӧн да шыпаслӧн аслас ин.



46. Артмӧд шыпасъясысь кыв да гиж. Инды, кымын шы да шыпас кывйын. Артмӧдӧм кывнас лӧсьӧд сӧрникузя.

р у в с ы д ь



Низь – 3 шы [низ'], 4 шыпас.



47. Лыдды текстсӧ.

Руч.

Коми муын ручыд зэв важся олысь. Сийӧ пыр ӧти пӧлӧс паськӧм новлӧ. Мышкыс гӧрдоват, морӧс-ыс да бӧж йылыс еджыд, пельыс сьӧд. Ручлӧн пушкыра бӧжыс аслас туша кузяыс лӧӧ. Тӧвся кадӧ

мудер руч мастера куталö лым пиö дзедьсьöм сьö-
лаöс. Ручлөн нырыс ёсь да дуксö кылö ылысянь.

И.Коданёв серти

◆ Мый тöдмалін руч йылысь?

◆ Гиж тöдчödöм кывъяссö. Инды, кымын шы
да шыпас быд кывйын.



Анбур.

? Кызди мöд ног позьö шуны сьöрсьөн-
бöрсьөн сулалысь 35 шыпас?

? Мыйла колö тöдны анбур?

48. Анбур серти лыдды шыпасъяслысь нимсö.

А а	Б б	В в	Г г	Д д	Дж дж	Дз дз	Е е
а	бö	вö	гö	дö	джö	дзö	е
Ё ё	Ж ж	З з	И и	і	Й й	К к	Л л
ё	жö	зö	и	чута і	йö	кö	лö
М м	Н н	О о	Ö ö	П п	Р р	С с	Т т
мö	нö	о	ö	пö	рö	сö	тö
Тш тш	У у	Ф ф	Х х	Ц ц	Ч ч	Ш ш	
тшö	у	фö	хö	цö	чö	шö	
Щ щ	ъ	Ы ы	ь	Э э	Ю ю	Я я	
щö	чорыд пас	ы	небыд пас	э	ю	я	



Коми анбурын 35 шыпас.

Быд шыпаслөн эм аслас ин да ним.

49. Лыдды да төдмав, кутшөм шыпасъяс оз тырмыны. Инды анбурын кольөм шыпасъяслысь инсө. Кольөм шыпасъясысь артмөд кыв да гиж.

**А Б В Г Д Дж Дз Е Ё Ж З И І Й Л М Н О
П С Т Тш У Ф Х Ц Ч Ш Щ Ъ Ы Ь Э Ю Я**

50. Гиж кывъяссө анбур серти. Найөс сьөрсьөн-бөрсьөн гижигад видзөд мөд да коймөд шыпасъяс вылас.

вөркань, визяорда, вурд, варыш



Кывкудйын кывъяссө сетөма анбур серти. Кывкуд лөсьөдігөн урчитоны кывйыслысь медводдза шыпассө. Өткодъ шыпассянь заводитчысь кывъяс тэчигөн урчитоны водзө мунысь шыпасъяссө.



51. Лыдды. Помав сёрникузясө вөрса пемөс нимъяс анбур серти гижөмөн.

Миян пармаын уна сикас вөрпа эм: анча, ..., ...,

...,



Гласнӧй шыяс да шыпасъяс.

? Кымын гласнӧй шы да шыпас коми кывӱын?

? Кызди артмӧны гласнӧй шыяс?



52. Лыдды да инды, кӧні гласнӧй шыяс, а кӧні гласнӧй шыпасъяс.



Коми кывйын 7 гласнӧй шы: [а], [о] [у], [ы], [э], [и], [ӧ].

Коми кывйын 12 гласнӧй шыпас: а, о, у, ы, э, и, і, ӧ, е, ё, ю, я.

Гласнӧй шыяс шуигӧн вом пыр петысь сынӧдыс оз мытшась.

Гласнӧй шыяс артмӧны гӧлӧсысь.

53. Лыдды нӧдкывсӧ да тӧдмав. Содтав кола-на шыпасъяс да гиж кывъяссӧ.

Варгыл... кока, шоньд пася,

Парма-ягын тапикас...ӧ.

Лӧчыд гыжъя – пуӧ кайӧ.

Тӧвнас уз...ӧ. Коді тайӧ?

◆ Мый отсаліс тӧдмавны нӧдкывсӧ?



54. Лыдды сӧрникузяяссӧ. Артмӧд висът да гиж. Визьнит гласнӧй шыпасъяссӧ.

Ош.

Тӧвбыд ошкыд вуграліс шоньдінын. Арнас ош коз улӧ кодйис гу. Пырис Михайлӧ гуас да водіс. Тулыснас сійӧ петіс гусыс да муніс сӧян корсьны. Гуас ваяліс лыс, вылысас шыблаліс ньӧр чукӧр.

Г.Юшков серти



**Согласной шыяс да шыпасъяс.
Гора да гортём согласной шыяс.**

- ❓ *Кымын согласной шы да шыпас коми кывйын?*
- ❓ *Кызди артмёны согласной шыяс?*
- ❓ *Мыйён торъялёны гласной шыяс согласной шыясысь?*



55. Лыдды анбур серти согласной шы петкөд-лысь шыпасъяс. Кутшём шыпас эн лыдды да мыйла?

Коми кывйын 26 согласной шы. Гижигён согласной шыяссё пасйёны шыпасъясён. Согласной шыпасыс 21: б, в, г, д, ж, з, й, к, л, м, н, п, р, с, т, ч, ш, ф, х, ц, щ. Небыд пас (ь) да чорыд пас (ъ) некутшём сёрни шы оз пасйыны.



56. Шуав шыяссö параён:

[б] - [п]

[г] - [к]

дж [z] - тш[ч]

[д] - [т]

[з] - [с]

дз[z'] - ч [ч']

◆ Мыйён торъялö быд пара?

Согласнöй шыяс шуигён вом пыр петысь сынöдыс паныдалö мытшöд.

Согласнöй шыяс артмöны гөлöсысь да шумысь.

Гора согласнöй шыяс артмöны гөлöсысь да шумысь: **[б], [г], [д], [ж], [з]**.

Гортöм согласнöй шыяс артмöны шумысь: **[п], [к], [т], [ш], [с]**.

57. Гиж колана кывъяс содтöмөн да лöсьöд серпаса гижöд.

Дозмöрыдлөн гöныс ..., сьылыс Синмыс дзик Сьылі улас гöныс ... , быттö тшöка. Нырыс ... , крукылякодь. Бöж помыс

Отсöг кывъяс: **кузь, паськыд, сьöд, крепыд, пемыдруд, гöрд.**



58. Лыдды. Торйöдöм кывъяссö гиж да визьнит согласнöй шыпасъяссö.

Дозмөр.

Дозмөръяс олоны нейджыд кельёбөн, котыръясөн. Пуяс вылын пукалёны óta-модсьыс ылын. Гожомнас сёйоны турун кёйдыс, вотос, гут-гагйос, а төвнас – **пожом** лыс. Вөрті ветлігад веськалан кё дозмөр котыр вылө, найö ыджыд шыён **кыпөдчасны**.

◆ Гиж воддза сёрникузясө, визьнит подувассө да юөрпассө.

◆ Мый тэ нөшта төдан дозмөръяс йылысь?



Кельёб - пөткаяслөн ёсь нырөн лэбысь чукөр.



Слог.

? Мый сійö слогыс?

? Кутшөм шыяс вермёны артмөдны слогсө?

? Кызди колө төдмавны кывйысь слог лыдсө?

59. Комиөд да медводдза сувтсаногас лыдды кыв. Гиж кывъяссө слогъяс вылө юклөмөн.

1 – смородина

2 – черёмуха

3 – тополь

4 – муха



◆ Инды лөсявтөм кыв.

60. Лыдды. Юклы кывъяссö слогъяс вылö да гиж. Гласнöй шыпасъяс улö пукты чут.

пув мырпом турипув

- ◆ Кымын гласнöй шы быд кывйын?
- ◆ Кымын слогысь артмöмаöсь кывъясыс?
- ◆ Орччöд быд кывйысь гласнöй шы лыдсö да слог лыдсö.

Кыв артмö слогъясысь. Слог – сийö кыв юкөн.

Слог лыдсö позьö тöдмавны гласнöй лыд серти.

Быд кывйын слогыс сы мында, мыйта гласнöй шыыс.

61. Мый гижöма карточкаяс вылас?



- ◆ Артмөд слогъяссыыс кыв да гиж.
- ◆ Лөсьөд кывъяссыыс сёрникузя да гиж.

Кывъясын гласнӧй да согласнӧй шыяс артмөдӧны слогъяс.

Слог вермӧ артмыны ӧти гласнӧйысь: **ӧ-мидз, ӧ-гу-реч.**

Согласнӧй шы ӧтнас оз вермы артмӧдны слог.

- 62. Гиж сёрникузяссӧ шыпасъяс содталӧмӧн да слогъяс вылӧ юклӧмӧн.

Мырпом.

Кис...мӧм мырпом кол...квиж юра

Лыдтӧм с...рвидзӧ со н...рас.

Кытысь вотны, бура тӧдам,

Ӧдӧ дозъясаным лӧдам. *З.Шиликова*



Кывъяс визысь визьӧ вуджӧдӧм.



Кыдзи колӧ гижигӧн вуджӧдны кывъяссӧ визысь визьӧ?

63. Лыдды кывъяссӧ.

Лэ-бач, ко-кавны, крӧш-ки.

- ◆ Кутшөм кивъяс юкөма слогъяс вылө?
- ◆ Кутшөм кивъяс юкөма визьысь визьö вуджө-дөм могысь?



Öти визьысь мөд визьö вуджөдөм могысь кивсö колö юкны кык пельö.
Кивъяссö вуджөдны позьö сöмын слогъясөн.

64. Гиж кивъяссö слогъяс вылө юклөмөн, мед позис вуджөдны визьысь визьö.

Пыста, рака, вурдысь, пышкай.

- ◆ Кутшөм кив оз лөсяв? Мыйла?



Öти шыпас оз позь вуджөдны визьысь визьö и оз позь кольны воддза визяс: **яла, ниа**.
Оз позь вуджөдны визьысь визьö öти слога кивъяс: **сюзь, тар**.

65. Лыдды кивъяс визьысь визьö вуджөдөм йылысь. Гиж вуджөдны позьтөм кивъяс. Висьтав, мыйла найос оз позь вуджөдны.

Жонь, чикыш, ябыр, юсь, каля.



66. Лыдды кивбурсö. Гиж кивъяссö слогъяс вылө юклөмөн.

Пышкой.

Тöлын кöдзид.
Кынмö пышкой.
Гожся мозыд
Оз тай ышмав.

Виччысьö лэбач
Васьлысь петöм.
Зонмыд няньтор
Сылы сетас.

П.Бушенёв



Кывъяс визысь визьö вуджöдöм.

?

*Кызди колö вуджöдны визысь визьö
Й шыпаса кывъяс?*

67. Лыдды кывъяс визысь визьö вуджöдöм
йылысь.

Визысь визьö й шыпаса кыв
вуджöдигөн колö тöдны:

Согласнöй водзын й
мöд визьö
оз вуджöдсьы.

вай – ны
кый – ны
луй – ны
кöй – дыс

Гласнöй водзын
сулалысь й вуджöдсьö
мöд визьö.

ва – йис
кы – йис
лы – йис
бöр – йис

◆ Содты быд столбикö кык кывйөн.



68. Артмөд сёрникузязясысь висът. Юрнимав да гиж. Юклы й шыпаса кывъяссö визъысь визьö вуджөдöм вылö.

Зонка кайис кыздз пу вылö да öшөдiс вöчöмторсö увйö. Яков лöсьöдiс лэбачьяслы сёянiн. Лэбач сёйис став шыдöссö да лэбзис. Пöв вылö пуксис гöрд морöса жонь. Детинка вайис шыдöс, крöшитiс нянь.



69. Лыдды сёрникузаяс. Юклы й шыпаса кывъяссö визъысь визьö вуджөдöм вылö да гиж.

1. Мишук усис да дойдiс коксö.
2. Вöралысь вайис уна кыйдöс.
3. Чери кыйысьлы шедiс ыджыд сир.
4. Турун пуктыны мунiсны войколөн.



Параа чорыд да небыд согласнӧйяс.

- ? Кутшӧм шыпасъяс гижсьӧны параа чорыд согласнӧйяс бӧрын?
- ? Кутшӧм шыпасъяс гижсьӧны параа небыд согласнӧйяс бӧрын?
- ? Кызди гижигӧн колӧ пасйыны согласнӧйяслысь чорыдлунсӧ да небыдлунсӧ?

70. Висьтав параа небыд да чорыд согласнӧйяс йылысь. Лыдды кывъяссӧ.



дадь
кӧза
лапа
намыр
сам
талун

дядь
визя
ляпа
нянь
сям
Катя

◆ Кызди кылöны торйöдöм согласнöйясыс вод-
дза столбикас? Кутшöм шыпас сулалö согласнöйяс
бöрас?

◆ Кызди кылöны торйöдöм согласнöйясыс мöд
столбикас? Кутшöм шыпас сулалö согласнöйяс
бöрас?



Сам – чери либö лэбачöс кыйигön вугырö либö
лэчкö пунктöм ылöг.



Чорыд **д, з, л, н, с, т** согласнöйяс бöрын
гижсьöны **а, о, у, э, и** гласнöй шыпасъяс.
Небыд [д'] [з'] [л'] [н'] [с'] [т'] согласнöйяс
бöрын гижсьöны **я, ё, ю, е, и** гласнöй шы-
пасъяс.

71. Лыдды. Кутшöм шыясön торъялöны кывъ-
ясыс?

Сэти – сеті, лок – лёк, нэм – нем, тури –
тюри, сой – сёй.

◆ Гиж кывъяссö. Параа чорыд согласнöй шы
петкöдлысь шыпассö визьнит öти визьön, параа
небыд согласнöй шы петкöдлысь шыпассö визь-
нит кык визьön.



Нур – нюр.



72. Лыдды кывбурсö. Гиж колана шыпасъяс содталöмөн.

Югыд шонд... тöдö:
Эшт...с арс... удж.
З...в нин сёрөн петö,
Ветлö öти сутш.

М.Лебедев



Небыд пас (ь) кыв помын.



Кызди позьö петкöдлыны кыв помын согласнöйяслысь небыдлунсö?

73. Лыдды кывъяссö да орчöд найöс.

кын – кынь

кыз – кызь

пас – пась

- ◆ Мыйöн найö торъялöны?
- ◆ Кызди кылöны согласнöй шыясыс кыв помас?
- ◆ Мый гижöма кыв помас параа небыд согласнöй бöрын?



Кыв помын параа небыд согласнöй бöрын гижсьö **небыд пас (ь)**: дадь, кызь, пась, пель, кань, бать.


74. Гиж гортса пемӧс нимъяс, сэсся вӧрса пемӧс нимъяс.


Низь, порсь, вурдысь, кань, чань.

◆ Мый ӧткодыс кывъясас? Мыйла?

◆ Лӧсьӧд кык сёрникузя да гиж.


75. Тӧдмав ребусъяс да гиж.



 76. Лыдды кутшӧм? юалӧм вылӧ вочавидзысь кывъяс. Бӧрйы лӧсялана кывъяс, артмӧд кывтэчасъяс да гиж. Визьнит параа небыд согласнойяссӧ.

Кузь ..., лӧнь ..., сэзь ..., уль ..., выль ..., гырысь ..., ёсь ..., пӧрысь ..., сись ..., эзысь

Отсӧг кывъяс: *лун, турун, лым, пурт, пу, вӧнь, лун, картофель, морт, тӧлысь, керка, тӧв.*

 **Кузь вӧнь.**



Небыд пас (ь) кыв шöрын.

? Кызди позьö петкöдлыны кыв шöрын параа согласнöйяслысь небыдлунсö?



77. Лыдды кывъяссö. Инды öткодълунсö да торъя-лöмсö.

кань каньпи

◆ Кöни сулалö кывъясас ь?

◆ Кутшöм согласнöй бöрын да кутшöм согласнöй водзын гижöма ь **каньпи** кывйын?



Кыв шöрын небыд согласнöйяс бöрын чорыд согласнöйяс водзын гижсьö **небыд пас (ь): каньпи, кольта.**

78. Гиж кывъяссö кык чукөрö юкөмөн. Вись-тав, мыйла тайö кывъясас колö гижны ь.

Пель, чунькытш, пась, пельпом, чунь, паськөм.



Кыв шöрын небыд согласнöй бöрын ö, ы шыпасъяс водзын колö гижны небыд пас (ь): **сьöлөм, ньыв.**

79. Гиж сөмын небыд паса кывъяссö.

Вурдысь, сикт, сьölөм, телега, пелысь, ниа, сьöd-
бöж, ньыв, сьылысь.

- ◆ Кутшöм согласнöй бöрын гижöма кывъясас ь?
- ◆ Кор кыв шöрын колö гижны ь?



80. Шыпасъяс содталөмөн гиж выль кывъяс.

Порсь – ..., выль – ... , кузь – ..., зіль – ...,
дась –



Коль – кольта.

- ◆ Небыд паса кывъяснас гиж кык сёрникузя.



Небыд пас (ь) кыв помын да кыв шöрын.

81. Лыдды кывъяссö.

Кильчö, гөсьтя, кельчи.

- ◆ Кутшöм согласнöй водзын кывъясас гижö-
ма ь?
- ◆ Кор кыв шöрын колö гижны ь?

82. Лыдды да босът төд вылад.

Кывйын правилө серти гижанногсö шуоны **орфограммаөн**.



Небыд пас кыв помын да шöрын гижöм – тайö орфограмма. *Пань, паньнас* кывъясын орфограммаыс кыв помас да кыв шöрас.

Гижигөн öшыбкаяс öлөдöм могысь колö уськөдны төд вылө гижан правилөсö либö орфограммасö.

Кывъяссö позьö гижны шыяс серти: **[пан']**, **[пан'нас]**. Кывсö шыяс серти гижöмыс шусьö **транскрипцияөн**. Орччөд: **[пас'көм]** – транскрипцияөн гижöм кыв; **паськөм** – шыпасөн гижöм кыв.

😊😊 83. Комиөд кывъяссö да гиж.

с. 111
102
рябчик
пихта
черёмуха

	Ь			
	Ь			
	Ь			

	Д	Ь	ива
	З	Ь	соболь
	Н	Ь	песец



Кык разной небыд согласной костын гижсьö небыд пас (ь): **кольча, шутьлявны**.

84. Лыдды. Юрнимав текстсö. Гиж сöмын небыд паса кывъяссö.



Кыліс пöткaлöн лэбзьöм шы. Му вылö пуксис сьöла. Сійö видзöдiс гөгөр.

Со пöтка дзик нин ме дiнын. Зэв бура аддза сылысь ичöтик гөгрöс синсö, дженьыдик гөрба нырсö, тэрыба котралысь вöсньыдик коксö, голя увсьыс сьöд пассö. Пукала да любуйтча збой пöткаöн. Сьöла казяліс менö да öдйö лэбзис кызд вылö.

И.Коданёв серти

◆ Мöд сёрникузяысь инды сюрöса юкөдъяссö (подувпас да юөрпас).

 85. Лыдды колана ногөн. Гиж ь содталöмөн.

Руч пö мудер,

Кöч пö полыс...,

Кöин скөр да вывтi горш.

Ур пö пел...к зэв,

Вөркан... колыс...,

Гуын тövбыд уз...ö ош.

А.Мишарина

◆ Кутшöм кывйөн позьö вежны колысь кыв?



Небыд паса кывъяс визысь визьö вуджөдөм.

?

Кызди колö вуджөдны визысь визьö небыд паса кывъяс?

86. Лыдды колана ногөн. Орччөд торйөдөм кывъяссö, висьтав налысь гижанногсö, инды орфограмма.

Чужан му.

Эм му, көн ягын дозмөр **сылö**,
Көн нюрын öшкамöшка **сылö**.
Тöдса сийö йöзлы Эжва юөн,
Лоö мен да тэныд чужан муөн.

В.Лодыгин

◆ Кызди гөгөрвоан: «öшкамöшкасылö»?



87. Юклы кывъяссö визысь визьö вуджөдөм вылö да гиж.

Вольпась, деньга, паськөм, ельдөг, пельöс, кельчи.



Кывъяс визысь визьö вуджөдигөн **небыд пас (ь)** оз торйөдсы сы водзын сулалысь согласнойсьыс: **пись-мö, разь-сьö-ма.**

☺☺ 88. Төдмав ребусъяс да гиж слогъяс вылө юк-
лөмөн.



🏠 89. Гиж паныд вежөртаса кывъяс.

Кузь, сьөкыд, важ, чукля, еджыд.

👉 **Кузь – дженьыд.**

◆ Лөсьөд кык сёрникузя да гиж.

🔔 **Небыд пас (ь) кыв помын да кыв шөрын.**

90. Лыдды. Инды кывъяс, көні эм ь. Гиж найос, гөгөрвоод кывъяслысь гижанногсө.

Йөра.

Миян вөръясын медся ыджыд олысь – йөра. Йөраыд – ён вөрса пемөс. Сійөс шуоны вөрса багатырөн.

Йөра тэрыб кузь кокнас ветлө вөрөд да нюрөд. Сійө бура чеччалө, котралө да вартчө. Радейтө

пуяслысь корсö
да кырсьсö, том
пожöм йывъяс.
Сейö уна сикас
турун, вотöс да
тшак. Ай йöра-
лөн тöвнас усью
сюрыс, а водз
тулыснас сийö
бөр заводитö
быдмыны.



Вöрса пемöс öдийö велалö йöз динö. Весиг морт
киысь сейö нянь, радейтö нювны сов.

- ◆ Мыйла йöраöс шуöны вöрса багатырөн?
- ◆ Мый сейö йöра?

91. Лыдды гижöдсö да орччöд серпаскöд.

Мича пемöс.

Вөр керкасянь **воськов** кызь сайын тыдовтчис
йöра. Кутшöм жö сийö вöли мича!

Вылын кутан юр вылас дöввидзö уна вожа
паськыд сюр. Голя улас **öшалö** исерга кодь кучик.
Кымөр сайысь **писькöдчöм** шондi водзас рудоват
куыс лöсталö. Ёсь пельяссö чургöдöма водзлань.

Йöра лэптiс юрсö, кыскыштiс гөрба нырнас сы-
нöдсö, **кывзысьыштiс**. Сэсся бөр вошис пуяс сайö.

◆ Кутшөм кывъяс отсөгөн петкөдлөма йөра-
лысь мичлунсө?

◆ Гиж төдчөдөм кывъяссө визъысь визьö ву-
джөдөм вылө юклөмөн.

◆ Гиж воддза сёрникузясө, визънит подувпассө
да юөрпассө.



Е, Ё, Ю, Я – йота гласнөйяс.

92. Висьтав, мый серпасалөма.



ельдөг



ёкыш



юкмөс



ягсер

◆ Кымын шы кылө быд кывйын?

◆ Гиж кывъяссө. Кымын шыпас гижин быд
кывйын?

Е, ё, ю, я – йота гласнөйяс.

Кыв заводитчигөн да гласнөй бөрын е, ё, ю, я
шыпасъяс пасйөны кык шы: е – [йэ] – *ельдөг*,
ё – [йо] – *ёкыш*, ю – [йу] – *юкмөс*, я – [йа] –
ягсер.



93. Гиж да визьнит йота гласнӧйяса кывъяссӧ. Висьтав, мыйла тайӧ кывъясас шы да шыпас лыдыс абу ӧтмында.


Ягсянь неылын визувтӧ ёль. Ваыс сылӧн югыд да тувсов енӧж кодъ сӧстӧм. Уна вотчысьӧс сійӧ юкталӧ чӧскыд ванас.


◆ Воддза сёрникузяысь визьнит сюрӧса юкӧдъ-яссӧ.

94. Лыдды кывъяссӧ да орччӧд найӧс.

Ем – зеп, ёді – сёркни, югӧр – сюр, яг – пывсян.

◆ Висьтав йота гласнӧйяс йылысь.

 Параа небыд согласнӧй бӧрын **я, ю, е, ё** йота гласнӧйяс индӧны согласнӧйыслысь небыдлунсӧ: **ляз, сюр, небыд, сёрӧм.**

 **95.** Гижӧй нимъяссӧ кык пельӧ юклӧмӧн да колана шыпасъяс содталӧмӧн.

Тан..., Яков, Юрий, Л..ба, Л...ня, Ёгор, Ефим, Л...на.



Согласнойяс бöрын А да Я шыпасьяс гижöм.

96. Висьтав, мый серпасалöма. Гиж кывъяссö.



лампа



лямба


- ◆ Орчöд кык кыв: **лампа, лямба.**
- ◆ Кыдзи кылöны кывъясас воддза согласной шыясыс?
- ◆ Кыдзи кылöны гласнойясыс?
- ◆ Кутшöм шыпас гижöма параа чорыд согласной бöрын?
- ◆ Кутшöм шыпас гижöма параа небыд согласной бöрын?

97. Висьтав кывъяслысь гижанногсö.

Лапа – ляпа, дадь – дядь, нар – няр.

Согласнӱяс бӱрын **а** да **я** шыпасъяс гижӱм – тайӱ **орфограмма**.


Гижигӱн уськӱд тӱд вылад тайӱ орфограм-
маыслысь гижанногсӱ.

 Параа да паратӱм чорыд согласнӱяс бӱрын гижсьӱ **а: лампа, багыр**.


Параа небыд согласнӱяс бӱрын, дз да **ч** кындзи, гижсьӱ **я: лямба, панявны; но: чарӱм, кӱдзавны**.

98. Гиж чутъяс местаӱ **а** либӱ **я** шыпас содта-
лӱмӱн.

Пӱл...н, курт...н, чел...дь, з...рни, л...пкор,
пывс...н, с...кар, н...нь, кол...оз.

 **Пӱлян** – тӱщӱ заа турунысь либӱ гумйысь
вӱчӱм пӱлялӱмӱн ворсантор.

Коляоз – лыска пуяслӱн дзоридз, оз кодъ гӱрд.

 **99.** Содтав лӱсялана кывъяс да гиж. Аддзы
сӱрникузясысь подувпассӱ да визънит.

1. ... трубаысь петӱс тшы. 2. Мамӱ пӱжалӱс
чӱскыд 3. Ивӱ кыйис паськыд 4. Ю весь-
тын лӱбалӱс

Отсӱг кывъяс: **ляпа, пывсян, каля, чери-
нянь**.



Согласнойяс бöрын А да Я шыпасьяс гижöм.

100. Лыдды кывбурсö.

Пызан бердад сёйны-юны
Тэрмасьны оз ков,
Эн, эн вунöд йöзлы шуны:
– Нянь да сов!

С. Попов

◆ Кор колö шуны: «Нянь да сов!»?

101. Лыдды сёян нимъяссö. Торйöдöм кывъяс-
ыслысь гөгөрвоод гижанногсö.



ид пызя рок

азя шыд

льöм ляз

102. Содтав сёрникузяясас 101-öд уджысь
лöсялана кывъяс да гиж.

Талун школаын ыджыд гаж. Праздник вылö
воис уна гöсьт. Марпа тьöt пуис чöскыд сёян.

Челядь чөсмасисны коми йөзлөн важ сёянён.
Таня азыма паняліс льём Федялы сьёлём
вылас воис ... шыд. А Мишук окотапырысь сёйис
... .. рок.



103. Лыдды шусьөгъяссө да гиж колана
шыпасъяс содталөмөн. Кызди тэ гөгөрвоан
шусьөгъяссө? Кор да мыйла тадзи шуёны?

Дыша кө он ов, лоас н...нь да сов.

Тулысын кө уз...н – арын шогё ус...н.



Согласнойяе бөрын У да Ю шыпасъяс гижөм.

104. Орчөд кык кыв: **нур, нюр.**

◆ Кызди кылёны медводдза согласной шы-
ясыс?

◆ Кутшөм гласной шыяс кылёны?

◆ Мыйён торъялёны гижөм кывъясыс?

◆ Кутшөм шыпас гижөма параа чорыд соглас-
ной бөрын?

◆ Кутшөм шыпас гижөма параа небыд соглас-
ной бөрын?

◆ Кызди гөгөрвоан *нур* кывлысь вежөртассө?

◆ Дасьты *нур, нюр* кывъяс пыртөмөн кык
сёрникузя.

Согласнойяс бөрын у, ю шыпасъяс гижөм – тайё **орфограмма**.

Гижигөн уськөд төд вылад тайё орфограм-
маыслысь гижанногсө.



Параа чорыд да паратөм согласнойяс бөрын
гижсьё у: **нур, курөг**.

Параа небыд согласнойяс бөрын, дз да ч
кындзи, гижсьё ю: **нюр, люкавны; но:
дзугны, чуман**.



105. Лыдды кывъяссө. Аддзы быд визысь
лөсявтөм кыв. Мөвпышт, мыйла оз лөсяв?

Сюмөд, сюр, юсь, сюзь.

Турөб, сунис, тюрик, тупыль.



Тюрик – сунис трубича.

106. Колана кывъяс содталөмөн гиж сёрнику-
зяяссө.

Төв (мый керөма?) (кутшөм?) пельсь пу.

Кань (мый керөма?) (кутшөм?) бөжсө.

Юлань (мый керөмаөсь?) (кутшөм) шоръяс.

Отсөг кывъяс: **сюркнялөма, тюрөбтөмаөсь,
нюкыльтөма, визув, пашкыр, нюдз**.



Нюдз – куснясьысь, нюклясьысь (пу).



107. Лыдды гижодсö. Мөвпышт, кымын сёрникузя позьö артмöдны. Артмöд сёрникузяяс да гиж.

Тури олö нюрын сылөн кокъясыс кузьöсь лэбач кокныда восьлалö нюрті тури радейтö нурьясьны лягушаөн

◆ Медводдза сёрникузяысь инды сюрöса юкөдьяссö.



Согласнöйяс бöрын У да Ю шыпасъяс гижöм.

108. Лыдды кивъяссö да дасьтысь гижны кивзöмөн. Юклы кивъяссö кык пельö.

Нюм, дум, сю, туй, Колюк, кысук, Люба, нуны, сюмöд, нюйт.

109. Лыдды зумыд кывтэчасъяссö. Бөрйы матын вежöртаса кивъяс. Гиж чутъяс местаö колана шыпасъяс содталöмөн.

Ныр н...жöдны – ..., пель сайö с...ркнявны –

Отсöг кивъяс: **тöд вылö босьтны, лөгасьны код вылö кö.**



110. Содтав лөсялана шыпас да гиж.

1. Жар луно вотчысыя юисны кл $\frac{Y}{Ю}$ ч ва.
 2. С $\frac{Y}{Ю}$ сь вöралысь казяліс пöрöм пу дорысь утка поз.
 3. Зонка с $\frac{Y}{Ю}$ втöмөн кывзіс с $\frac{Y}{Ю}$ зьлысь буксöмсö.
- ◆ Тöдчöдöм кывсö видлав шы да шыпас бок-сянь.



Согласнойяс бöрын О да Ё шыпасьяс гижöм.

111. Орчöд кык кыв: **сой, сёй.**

- ◆ Кызди кылöны медводдза согласной шыясыс?
- ◆ Кутшöм гласной шыяс кылöны?
- ◆ Мыйöн торъялöны гижöм кывьяс?
- ◆ Кутшöм шыпас гижöма параа чорыд [с] согласной бöрын?
- ◆ Кутшöм шыпас гижöма параа небыд [с'] согласной бöрын?
- ◆ Мыйла гласной [о] шы гижигөн петкöдлысьсö кык пöлөс шыпасөн?
- ◆ Кымын öткодь шы кылö **сой, сёй** кывьяс шуигөн?
- ◆ Дасьты **сой, сёй** кывьяс пыртöмөн кык сёрни-кузя.



Параа да паратом чорыд согласнойяс бөрын гижсьо **о: сой, потан.**

Параа небыд согласнойяс бөрын, дз да ч кындзи, гижсьо **ё: сёй, но: дзор, чой.**

112. Гиж, чутьяс местао содты **о** либө **ё** шыпас.

С...рни, с...в, н...п, н...рпалом, л...впу, л...кгаг, с...йны, з...нка.

◆ Сетом кывьясон лосьод да гиж куим сёрникузя.



Ловпу – васодинын быдмысь корья пу (ольха).
Нёрпавны – висьодчыны.



Согласнойяс бөрын Э да Е шыпасьяс гижом.



Мыйла оти гласной [э] шы гижигон петкөдлысьо кык пөлос шыпасон?

113. Шу кывьяссө: **нэм, нем.**

◆ Кыдзи кылө медводдза согласной шыыс **нэм** кывйын?

◆ Кызди кылö медводдза согласнöй шыыс нем кывйын?

◆ Кутшöм шыпас гижöма парaa чорыд согласнöй бöрын?

◆ Кутшöм шыпас гижöма парaa небыд согласнöй бöрын?

Парaa чорыд согласнöйяс бöрын гижсьö э: **нэм, лэчюд.**

Парaa небыд да паратöм чорыд согласнöйяс бöрын гижсьö е: **нем, тешкодъ, кер.**



114. Лыдды кывъяссö, корсь орфограммаяс да дасьтысь гижны кывзöмөн.

Лежнöг, тэрыб, детинка, енэж, зэр, лэбув, сэтөр.



Лэбув – сюръяяс вылын восьсаин, турун либö пес видзанін.

115. Содтав сёрникузяяс 113-öd уджысь лöсялана кывъяс да гиж öти юкөн.

Витя мөдöдчис ю дорö вотчыны. Берег пöлөн быдмö уна чуткасьысь (мый?). (Кутшöм?) зонка зiля тыртiс дозсö. Туй бокысь сёйис чöскыд сьöд (мый?).

Друг югнитіс чардби, шливөбтіс көдзыд (мый?).
(Коді?) котөртіс сиктлань да дзевсис (кытчө?).
(Көні?) мыччысис шонді. Витя котөртіс гортас.



116. Бөрйы лөсялана слог да гиж слогъяс
вылө юклөмөн.

(Лэ, ле)...бач, (нэ, не)...быд, (сэ, се)...рам,
(чэ, че)...ри, (нэ, не)...дыр, (пэ, пе)...мөс.

◆ Сетөм кывъясөн лөсьөд да гиж кык сёрни-
кузя.



**Согласнөйяс бөрын Э да Е
шыпасъяс гижөм.**

117. Лыдды кывбурсө колана ногөн.

Книга.

Мунө уна кияс пыр,
Важмө, көть и мөвпөн тыр.
Босьтам сунис, кл...й да ем,
С...там выльысь овны н...м.
Водзө лыддяс уна морт,
Оз и бырлы сылөн ёрт.

В.Лодыгин

- ◆ Висьтав, мыйла колö бура видзны небöггъяс.
- ◆ Гөгөрвоод тöдчöдöм кывъяслысь гижанногсö да гиж найöс колана шыпасъяс содталöмөн.

118. Видзöдлы серпассö да тöдмась. Лöсьöд нейдждьд висьт сетöм кывъяс пыртöмөн. Висьтсö юрнимав да гиж.



Отсöг кывъяс: *Сеня, Лена, небöг, сетны выль олöм, клейтны, вöчны буртор, аттьöалис.*



119. Гиж. Чутъяс местаö содтав колана шыпасъяс.

Н...бöг – сийö т...над бур ёрт. Н...бöгтö дасьтö уна йöз. Бура видз сийöс. Листав сöстöм киён. Н...кор эн с...рпасав н...бöгад. Эн кусньöдлы листъяссö.



Согласнойяе бөрын И да і шыпасьяе гижөм.

? Мыйла гижигөн өти гласной [и] шы петкөдлысьё кык пөлөс шыпасөн?

120. Орчөд кык кыв: **сім, син.**

◆ Кызди кылө согласной шыыс **і** водзвылын **сім** кывйын?

◆ Кызди кылө согласной шыыс **и** водзвылын **син** кывйын?

◆ Кутшөм шыпас гижөма параа чорыд согласной бөрын?

◆ Кутшөм шыпас гижөма параа небыд согласной бөрын?

Параа чорыд согласнойяе бөрын гижсьё **і**: **сім, мазі, көті.**

Параа небыд да паратөм чорыд согласнойяе бөрын гижсьё **и**: **син, би, видзөдны.**

121. Содты чутьяс местаө и либө **і**. Гиж.

Д... – Д...ма, з... – коз...н, мел... – Л...за, тан... – сун...с, с...м – с...н, көт... – өт... .

122. Корсь сетом действие нимъяслы паныд вежортаса кывъяс да гиж.

Петис – ..., висис – ..., пöдлалис – ..., чеччис –

Отсөг кывъяс: *бурдис, пырис, водис, восьтис.*



123. Гиж кывъяссö и да і шыпасъяс содталомөн.

Л...за, н...млун, кн...га, козьнал...сны, н...мкодъ, ворс...сны.

◆ Артмөд сетом кывъяссөн сёрникузяяс да дасъты «Дона козин» нима висът.



Согласнойяс бöрын И да і шыпасъяс гижөм.

124. Тöдмав. Гиж кывъяссö да гөгөрвоод налысь гижанногсö.

Сійö быдмö шоныдінын,
Сыысь пулам чöскыд рок.
Бөрөн лыддям, лоö чери,
Коді ёсь пиня да лёк.



125. Лыдды. Гиж лөсялана шыпасъяс содталөмөн.

Медым лэчыд пиня с...р

Черипиянөс эз йир,

Шыбит...сны с...рөс

Медся джуджыд й...рө.

С.Попов



Йир – ю пыдөсын джуджыд гуран.

◆ Кызди поэть мөд ногөн шуны: *эз йир, джуджыд йир?*


☺☺ 126. Лыдды гижөдсө.

Ёгорлөн медся радейтана удж – чери кыйөм. Талун сийө водз асывсянь бара мөдөдчис Гөгрөс ты дорө.

Колис недыр кад. Со и вөрзыштіс табыс да йөктыштіс ва веркөсын. Ёгор сьөкыда лэптіс шатинсө вывлань. Вугырө вөлі пысасьөма ыджыд-кодь сир.

◆ Серпас серти да сетөм кывъяс отсөгөн серпасав сирсө.

Отсөг кывъяс: *кер кодь кыз сир, көинлөн кодь юр, ёсь пиньяс, сьөд мыш, пелыс лоп пасьта, гөрдоват бөж, вижоват сьөмөн пөртмасьысь бок.*

 127. Артмөд сетөм кывъясысь сёрникузяяс да гиж.


Сир.

Миян, олө, юясын, сир, да, тыясын. Горш, ку-талө, уткапиянөс, чери. Сійө, чой-вокөн, аслас, чөсмасьлывлө, посни. Горшлун, өдйө, вөсна, сир, быдмө.



Дз [z'] шыа кывъяс.

128. Лыдды.



дзодзög



кодзув



өмидз

- ◆ Кымын шыпасөн пасйöма кывъяссө?
- ◆ Кымын шы кылө быд кыв шуигөн?
- ◆ Мыйла кывъясын шы да шыпас лыдыс абу өтмында?



Согласной дз [z'] шы пасйыссьö кык шыпасон: д да з: кыздз.

Дз [z'] – гора небыд согласной шы, гортөм пöлыс – ч [ч'].

129. Лыдды текстсö.

Кыздз пу.

Öшинь улын быдмö еджыд кока пашкыр кыздз пу. Тöвнас Кöдзыд Пöлыд козьналомá кыздз пуыслы пырыс тыдалана пушыд платтьö. Пуыслон быд чаль эзысьон пöртмасьö. Шондиá лунö увъяс вылас дзирдалöны лым чиръяс. А төла лунъясö йизьöм вожъясыс тильгун моз зельöдчöны. Тöвнад кыздз пуыд мойдын кодь мича!



◆ Кутшöм кывъяс отсöгөн петкöдлöма кыздз пуыслысь мичлунсö?

◆ Висьтав кыздз пулön мичлун йылысь.


◆ Бөрйы текстысь дз [z'] шыа кывъяс да лыдды.

130. Гиж кывъяссö комиён.

Гусь, цветок, солома, рожь, колено.


131. Гиж лöсялана кывъяс содталöмөн.


Сöдз ..., дзескыд ..., жодза ..., дзоля ..., дзор ..., дзирыд

 **Жодза йöв** – шоммысь либö шоммöм нин йöв.

Дзирыд – югъялысь, дзирдалысь.

Отсöг кывъяс: **пыж, йöв, пöль, вок, кодзув, ва, көмкот.**

 **Сöдз ва, ...**

 **132.** Лыдды кывбурсö. Гиж дз шыпас содталöмөн.

Визув ю көн визувтö,
...ори...алö ви...,
Югыд ваö ви...öдчö
Мича ныв кодь кы... .

И.Торопов



Дж [z] шыа кывъяс.

133. Лыдды кывъяссö.

Удж, джек, ыджыд.

- ◆ Кымын шыпасөн пасйöма кывъяссö?
- ◆ Кымын шы кылö быд кыв шуигөн?

Согласнöй **дж [z]** шы пасйыссö кык шы-
пасөн: д да **ж: джыдж.**

Дж [z] – гора чорыд согласнöй шы, гортöм
пöлыс – **тш [ч].**



134. Корсь сетöм признак нимъяслы паныд
вежöртаса кывъяс да гиж.

Ичöt – ..., ляпкыд – ..., кузь – ..., сьöd –

Отсög кывъяс: **джуджыд, еджыд, ыджыд,
дженъыд.**


135. Гиж кывпесансö. Чутъяс пыддиыс содтав
колана шыпасъяс.

Эжва кö...ын ...у...ыд бужöd,

Бужödланъыс пыжа ву...ö.

Г.Юшков

- ◆ Велödчы лыддыны кывпесансö тэрыба.



136. Лыдды висьтсö да юрнимав.

Ивук пырис пöльыслөн вöчаян керкаö. Тани кыпид. Джоджсö вольсалöма джодждöраөн. Ыджыд кудйын пöльыслөн вöчаян көлуй. Джаджйын сулалöны сямöдысь да пуысь вöчöм уна сикас дозмук. Со и öни пöльыс пукаліс джек вылын да вöчис дозмук.

◆ Гиж **дж** шыпаса кывъяссö.

◆ Медводдза сёрникузяысь инды сюрöса юкöдсö.

◆ Шы да шыпас серти видлав **джодждöра** кыв.

137. Лыдды. Висьтав, кызди тэ гөгөрвоан шусьөгъяссö.

1. Радейтан уджсьыд он мудз. 2. Уджтöгыд и чаг он бергöд. 3. Ичöтсянь кө радейтан уджтö, лоан бур уджалысьөн. 4. Мортыдлөн сямыс уджын тыдовтчö. 5. Талунъя уджтö аски кежлад оз кольлыны. 6. Кöни удж, сэни и шуд. 7. Зіль мортыд уджысь некор оз пöтлы.

◆ Велöд öти шусьөг да гиж небöгö видзöдтöг.



138. Артмöд кывъяс да гиж.

Ыджыд – ыджыдджык, дженьыд – ..., кузь – ..., джуджыд –



ТШ [ч] шыя кывъяс.

139. Лыдды кывъяссö.



потшöс

тшын

тшак

- ◆ Кымын шыпасöн пасйöма кывъяссö?
- ◆ Кымын шы кылö быд кыв шуигön?
- ◆ Корсь серпас серти **тш [ч]** шыя кывъяс. Лöсьöд да гиж наön некымын сёрникузя.

Согласнöй **тш [ч]** шы пасйыссьö кык шыпасöн: **т** да **ш**: *катша*.

Тш [ч] – гортöм чорыд согласнöй шы, гора пöлыс – **дж [z]**.

140. Лыдды текстсö. Гиж **тш** шыпаса кывъ-
яссö.

Öти гожся лунö эжмём анькытш му бокті Оля да Настук мөдөдчисны видз вылө. Кутшөм мича вöлі виддзыс! Тшапа довйөдлісны юрнас мича катшасинъяс. Кык чой нетшкисны зумыд заа дзоридзсö да кыисны юркытш.

◆ Шы да шыпас боксянь видлав **анькытш** кыв.



141. Лыдды да гиж колана ногөн дзугсьөм кывбурсö. Чутъяс местаас содтав шыпасъяс.

Сылысь зарни с...н.

Н...мкодьөдö менсьым синмөс

Мича катшас...н.

Төвру копрөдлө му д...нö



**Дз [z'], Дж [z], Тш [ч] шыяса кывъяс
визысь визьö вуджөдөм.**



Дз [z'], дж [z], тш [ч] шыяса кывъяс визысь визьö вуджөдны позьö тадзи: **дзо-дзöг, джу-джыд, китш-кö, ко-дзув.** Оз позь торйөдны д-з, д-ж, т-ш: **пе-тшөр,** а абу **пет-шөр.**

142. Мөвпышт, коді катша кывсö визьысь визьö вуджөдіс колана ногөн.



143. Комиод кывъяссö. Юклы кывъяссö вуджө-
дөм вылö да гиж.

Крапива, тень, бусы, высокий, колено, изго-
родь.

◆ Лосьод кык сёрникузя да гиж.



144. Лыдды шусьөгъяссö. Висьтав, кызди
найос гөгөрвоан.

Этшаджык сёрнит да унджык вöч.

Унджык вöран – дырджык олан.

◆ Гиж да юклы кывъяссö визьысь визьö вуджө-
дөм вылö.



Предмет, действие да признак нимъяс.

145. Лыдды. Орчөд кывъяс да сёрникузяяс. Висьтав, мыйон найо торъялөны óta-мөдсыс.

Кывъяс: тулыс, шонді, гажа, долыд, радлөны, кыдз, сылө.

Сёрникузяяс: Воис гажа тулыс. Енэжын нюмъя-лө мелі шонді. Ракаяс дасьтөны аслыныс оланін.

◆ **Кывъяс** дорас сувтөд юалөмъяс. Мөвпышт, мый петкөдлө быд кыв: предмет, признак, действие.

146. Висьтав кывсикасъяс йылысь схема серти.

Кывсикасъяс

Предмет ним	Признак ним	Действие ним
Эмакыв	Кывберд	Кадакыв
Коді?	Кутшөм?	Мый вөчө?
рака, пон	мича	Мый керө?
Мый?	кельыдлөз	кравзө
енэж, кыдз	сөстөм	увтө

147. Лыдды текстсö.

Миян войвылын медся шуда кадыс – тулыс. Пöжö ярьюгид шондi. Лунвывсянь пöльтö небыдик тöвру. Луннас керка вевтъяс вылысь тёпкö му вылö войтва. Войнас öшöдчöны йинёнъяс. Юланьö визувтöны визув шоръяс.

◆ Инды предмет, действие да признак нимъяс.

◆ Медбөръя сёрникузяысь корсь подувпас да юörпас. Юалёмъяс отсöгөн петкöдлы кывъяслысь йитöдсö.



Лунвывсянь пöльтö небыдик тöвру.

Мый йылысь висътавсö сёрникузяас? Мый пöльтö? – *Пöльтö тöвру. Тöвру – тайö подувпас.*

Тöвру мый вöчö? – *Тöвру пöльтö. Пöльтö – тайö юörпас.*

Кутшöм тöвру? – *Небыдик тöвру.*

Пöльтö кысянь? – *Пöльтö лунвывсянь.*



148. Гиж кывъяссö чукөръяс вылö торйöдöмөн.

Йöз	Пемöс	Быдмög
-----	-------	--------

Кывъяс: *конюк, вöв, зöр, мöс, турун, пастук, ош, кыйсьысь, öмидз, вöралысь, вурдысь, пипу.*



Эмакыв.

149. Видзод серпасъяс. Кодос да мый аддзан серпасъяс вывсьыс?

◆ Быд кывйысь торйод медводдза шыпассо да лыдды кывсо.



? . . . н



? . с



? . . а



? . . . н



? ж



? . . . а

Предмет нимъяс вочавидзоны кодi? да мый? юаломъяс выло.

Кодi? *Мос, анча, ыж.* Мый? *Эшкын, куран, ведра.*

Предмет петкодлысь кыв шусьо эмакывйон.



150. Содты лөсялана кывъяс да гиж.

Уджалан көлуй: (мый?) струж, ..., ...,

Тасьті-пань: (мый?) стөкан, ..., ...,

Вөрса пемөс: (коді?) йөра, ..., ...,

151. Бөрйы да гиж **мый?** юалөм вылө вочавидзысь кывъяс.

Кыз, гым, зіль, кык, зэр, водзын, шер, муно, чардби, вурд.



Шер – йиа зэр.

◆ Гөгөрвоод вежөртассө **мый?** юалөм вылө вочавидзысь кывъясыслысь.



Мый? юалөм сувтөдам ловтөм предмет нимъяс дорө.

152. Вочавидз юалөмъяс вылө.

1. Коді пусьө? 2. Коді вайө йөв? 3. Коді чеччалө пуысь пуө? 4. Коді дзизгө?

Отсөг кывъяс: *ур, мөс, пусьысь, ном.*



Коді? юалөм сувтөдам йөз да пемөс нимъ-яс дорө.



153. Лыдды. Бөрйөмөн гиж коді? да мый? юалөмъяс вылө вочавидзысь кывъяс.

Чирк, бобөнянь, енгаг, лапкор, бобув, лежнөг, пыста, зөридз.



Зөридз – васөдінын, ты доръясын быдмысь турун.



Коді? Ябыр, ...
Мый? Вижьюр, ...



Эмакывлөн лыд. Ъ да Ъ торйөдан пасъяс.

154. Лыдды. Мыйөн торъялөны кывъясыс?



ПОЖӨМ – ПОЖӨМЪЯС



КЫДЗ – КЫДЗЪЯС

Эмакывъяслөн эм өтка да уна лыд.

Предмет нимъяс вермёны петкөдлыны өти либё уна өткодь предмет.

Өтка лыда эмакыв петкөдлө өти предмет, уна лыда эмакыв – кык либё некымын предмет.

◆ Кутшөм шыпас гижөма **пожөмъяс** кывйын **-яс** водзас? Кыдзи кылө **пожөм** кывйын медбөръя согласнөй шыыс?

◆ Кутшөм шыпас гижөма **кызъяс** кывйын **-яс** водзас? Кыдзи кылө **кыз** кывйын медбөръя согласнөй шыыс?

Чорыд согласнөй бөрын **-яс** водзын гижсьө **ь** – **торйөдан чорыд пас.**

Небыд согласнөй бөрын **-яс** водзын гижсьө **ь** – **торйөдан небыд пас.**

155. Лыдды кывъяссө. Мыйла тайө кывъясас **-яс** водзас абу гижөма торйөдан **ь** да **ъ** пасъяс?

Муяс, пуяс, туйяс, войяс.

◆ Кор **-яс** водзын оз ков гижны **ь** ни **ъ**?



Гласной да небыд й согласной бөрын я шы-
пас водзын торйөдан пас оз гижсьы: **рака-
яс, мойяс.**

156. Лыдды эмакывъяссө да төдмав налысь
лыдсө. Кутшөм согласнойяс бөрын **-яс** водзын
гижөма торйөдан **ъ** да **ь**?

Ъ	Ь
козъяс	кольяс
увъяс	жонъяс
коръяс	лэбачъяс
джыджъяс	лөдзъяс
потшъяс	бадьяс



157. Лыдды висьтсө да юрнимав. Гиж текст-
лысь шөр юкөнсө колана **ь** да **ъ** шыпасъяс
содталөмөн.

Эрд вылын быдмис пелысь пу.
Гожся кадө сийө ворслис аслас веж
кор...яснас. Сёр арын тайө пуас
өзйисны мича ярьюгыд **роз...яс.**

Өтчыд ме казялі шемөсмөдана
серпас. Пу **ув...яс** вылын вöрисны
уна съөдовруд **ёкмыл...яс.**



Лэбач...яс крепыда кутчысьомаось гыж...яснас ув...ясас да кокалоны пелысь тус...яссö.

Пелыськайяс казялісны менö, кыпöдісны юр...яснысö да лэбисны.

С.Раевский серти

◆ Висьтав гижанногсö тöдчöдöм кывъяслысь.



Пелыськай – пышкай рöдысь вöрса ичöt лэбач (дрозд-рябинник).



**Торйöдан Ъ да Ъ паса кывъяс
визысь визьö вуджöдöм.**

?

Кызди колö вуджöдны визысь визьö торйöдан Ъ да Ъ паса кывъяс?

158. Гиж колана **ь** да **ъ** шыпасъяс содталöмön да кык пельö юкöмön.

Юс...яс, кутш...яс, варыш...яс, сиз...яс, сыр-чик...яс, низ...яс.

◆ Мөвпышт да висьтав, мыйла öти кывъясын гижöма торйöдан небыд пас, мөдъясын – торйöдан чорыд пас.

◆ Тöдчöдöм кывъяснас лöсьöд сёрникузяяс.

159. Гиж кывъяссö уна лыдын. Кутшöм кыв оз лöсяв быд визьын?

Чикыш, кöк, руч, ябыр.

Черань, тури, юрсигусь, лöдз.

Рака, пыста, енгаг, катша.

160. Лыдды кывъяс вуджöдöм йылысь. Юк-лы кывъяссö слогъяс вылö, мед позис вуджöдны визьысь визьö.

Дзöдзöгъяс, кöчъяс, джыджъяс, истанъяс.



Кывъяссö öти визьысь мöд визьö вуджö-дигөн торйöдан ь да ь пасъяс оз торйöдсы-ны согласнöйясысь: *сюзь-яс, бобувь-яс*.



161. Гиж лöсялана кывъяс содталöмөн. Чуть-яс местаас содтав торйöдан ь да ь пасъяс.

Видз вылас олöмыс пуö. Со мича ... лэбалö-ны öти дзоридзянь мöдö. Тэрыб ... чиркöны-чеччалöны. ... вертолёт моз тэрмасьтöг вöчöны кытш...яс. Зиль ... нёнялöны юмовсö чöскыд дзо-ридз...яслысь. Вöсни кока ... чатрасьöны, бöжнас котшкöдöны муас.

Отсөг кывъяс: *мазияс, юрсигус...яс, сырчик...яс, бобув...яс, чирк...яс.*

◆ Содты 1–2 сёрникузя видзвывса серпас йылысь.



**Морт нимъясын, овъясын да вичъясын
ыджыд шыпас.**

162. Лыдды, кодъяс сёрнитöны телефон пыр.

- Чолём, Ваня!
- Видза олан, Андрей!

◆ Помав зонкаяслысь сёрнисö.



Мишарин Иван

Попов Андрей



Морт ним, ов да вич гижсьоны ыджыд шы-
пассянь.

163. Лыдды.

Тайö кык ёрт: Иван да Андрей. Иванлысь
батьсö шуоны Мишарин Николай Алексеевичөн.
Андрейлөн батьыс – Попов Василий Иванович.

◆ Кызди мөд ног позьö шуны Андрейös да
Иванös?

◆ Кызди мөдасны шуны найös, кор быдмасны?

Быд мортлөн эм ов, ним да вич: **Мишарин
Иван Николаевич, Попов Андрей Василье-
вич**. Ним-вич серти ми торйöдам öта-
мөднымös.

Öти и сийö жö мортсö позьö шуны уна
ногөн: **Иван, Ваня, Ваньö, Ивö**.

164. Лыдды овъяс да гөгөрвоөд налысь арт-
манногсö. Гиж найös анбур серти.

Пыстин, Вурдов, Чесноков, Расов, Канев, Сизев,
Шаньгин, Налимов.



165. Гиж аслад класса вит велөдчысьлысь
овсö да нимсö анбур серти.



Йӧзкостса ним-вичьяс.



Йӧзкостса ним-вичьяс гижсьӧны ыджыд шыпасянь.

166. Лыдды коми ногӧн ним-вич. Мӧвпышт, мыйла тадзи шуӧны сиктсаяс.



Василий
Фёдорович

Педӧр Вась

Гудӧк Вась



Анна
Дмитриевна

Митрей Анна

Пошта Анна



Николай
Трофимович

Трӧш Микол

Пач Миколай

◆ Висьтав серпас серти йӧз йылысь. Мыйла сиктсаяс шуӧны: Гудӧк Вась, Пошта Анна да Пач Миколай?

167. Лыдды.

1. Колялы талун шедіс ыджыд **йөрш**. Водз асыв **Йөрш** Микулай восьлаліс вадорлань.

2. Павел ичөтдырсяньыс вөлі статья да **ён**. Сиктсаяс сійөс **Ён** Пашён шуоны.

◆ Висьтав, мыйла төдчөдөм кывъяслөн гижан-ногыс торъялө.



168. Гиж вит эмакыв, көні 3 шы да 4 шыпас. Быд кыв дінө сувтөд юалөм.



Мый? Кизь. Коді? Сизь.



169. Төдмав аслад сиктса йөзлысь прөзвищө-яссө да гиж. Мөвпышт, кызди артмөмаось найө.



Пемөс нимъясын ыджыд шыпас.

170. Корсь пөвсө да гиж.

мөс

вөв

көза

пон

кань

Лыско

Сюрук

Мурка

Карко

Миля



Пемӧс нимъяс гижсьӧны ыджыд шыпасянь.

171. Гиж. Содты лӧсялана пемӧс нимъяс.

1. Видз вылын кыскалӧ турун юръяс ... вӧв.
2. Кӧзяин моз керка-карта видзӧ ... пон . 3. Паччӧр вылын мургӧ-мойдӧ ... кань . 4. Гидын баксӧ ... кӧза.

172. Лыдды текст-серпас.

Прошка.

Каньпиыс пушyd тупыль кодь, пашкыр бӧжа. Ачыс рудиник, морӧсыс да лапаясыс еджыдикӧсь, кузь уска. Бикиньясӧн ворсӧ-югъялӧ гырысь синмыс. Ёсь йыла пельнас пыр сюся кывзысьӧ: оз-ӧ кӧнкӧ шыр шарӧдчы. Кокыс тӧрыб. Лӧчыд гыжнас тшапнитас – он бара мездысь!

◆ Лӧсьӧд текст-серпас пон (понпи) либӧ кань (каньпи) йылысь.



173. Юклы сӧрникузяяс вылӧ да гиж. Висьтсӧ юрнимав.

Ывлаын котраліс Катшыс пон челядь вӧчисны сылы чом чомйыс артмис лӧсьыд сэтчӧ вольсалісны важ эшкын шоньд лои Катшыслӧн чомйыс.

◆ Мөд сёрникузьяысь визьнит сюрöса юкөдь-
яссö.



Ним, вич, ов, прöзвищö да пемöс нимъяс –
тайö аснимъяс.

Аснимъяс гижсьöны ыджыд шыпассянь.



**Кар, сикт, грезд, ю нимъясын
ыджыд шыпас.**

174. Лыдды.

Ме ола Кöрткерöс сиктын. Сиктыс сулалö Эжва
ю бокын. Менам ыджыд чойöй велöдчö Сыктив-
карын. Пöль-пöчöй олöны Визябöж грездын. Ка-
никул дырйи ме ветлывла на дорö.

◆ Висьтав, мыйла некымын кыв гижöма ыджыд
шыпассянь.

◆ Вöч кывкöртöд: кызди гижсьöны кар, сикт,
грезд да ю нимъяс.



Кар, сикт, грезд да ю нимъяс гижсьöны
ыджыд шыпассянь.

175. Лыдды. Висьтав, кутшöм кывъяс гижö-
ма ыджыд шыпассянь.

Александра Мишарина чужис Көрткерөс районса Ыджыдвидз сиктын. Сиктгөгөрсә мичлуныс да муса Висер юыс ышөдісны сійөс гижны Коми му йылысь кывбуръяс. Александра Мишарина гижис:

Коми муёй, сьөлөмшөрöй,
Менам куслытөм любовь!

176. Лыдды кывбурсө. Гиж кывбурсьыс сикт нимъяс.

Коми мусö лым нин **ньöжйö** шебралö.
Воö тöлыс Вильгортö и Кебраö.
Усьö лымйыс мича еджыд бисерөн
Пажгаö и Гарьяö, и **Висерö**.

А.Мишарина

◆ Төдчөдөм кывъяслысь гөгөрвоод гижанногсö.



177. Содты лөсялана кывъяс да гиж аслад сикт йылысь.

Ме ола ... районса ... сиктын. Миян шөр сиктыс Сиктсянь неылын визувтö ... ю.



178. Төдмав аслад грезд (сикт) йылысь, дасьты проект да дорйы сійөс.



**Кар, сикт, грезд, ю нимъясын
ыджыд шыпас.**

179. Лыдды. Бөрйөмөн гиж ю нимъяссө.

Эжва – Коми муын Печора бөрын мөд ыджыд ю. Ассьыс васө сійө нуө Войвыв Двинаө. Эжва ю бокас нюжөдчөмаось мича туруна видзьяс. Тайө ю кузя важөн лэдзисны уна вөр.

◆ Мөвпышт, мыйла Эжва юсө тадзи шуөмаось.

180. Лыдды кывбурсө. Велөд да гиж юрсьыд.

Чужаніной менам – Чужаніной, тэ өд
Эжвадорса сикт. Ставлөн өти дзик.

А. Некрасов (Гамса)



181. Лыдды. Гиж сёрникузяссө колана кывъяс содталөмөн.

1. Ме кайи ... нөрыс йылө да видзөдлі сикт-лань. 2. Вотчысьяс воисны ... ёль дорөдз да пук-сисны шойччыны. 3. Митрей мөдөдчис ... ты дорө кыйсьыны. 4. ... видз вылын зымвидзис зорөд.

Отсөг кывъяс: **Сөдзва, Макар, Джуджыд, Лунбок.**

◆ Мөвпышт, мыйла сетөма татшөм нимъяс.



Кадакыв.

182. Серпасъяс серти висътав, мый вöчö зонка.



- ◆ Кутшöм кывъяс отсöгөн петкöдлан зонка-лысь вöчöм-керöмсö?
- ◆ Висътав, кыдзи тэ тöждысян тöвнас лэбачьяс вöсна.

Действие нимъяс вочавидзöны мый вöчны?
 мый керö? мый вöчö? мый керис? мый
 вöчис? мый вöчисны? мый вöчасны?
 юалöмъяс вылö.

Действие петкöдлысь кыв шусьö када-
 кывйöн.

**Пилитны, пилитö, пилитис, пилитисны, пи-
 литасны** – тайö кадакывъяс.

183. Лыдды. Юалөмъяс отсөгөн аддзы кадакывъяс да гиж найос.

Пышкайяс радлөны.

Сыліс лым. Өшинь улын артмис паськыд ва гуран. Тайө васөдинсө радейтөны пышкайяс. Найө шпорөдчөны борднаныс, суналөны ваас, резөны өта-мөднысө. Лэбачьяс радлөны.

◆ Лыдды висьтсө действие петкөдлысь кывъяс колялөмөн. Ставыс-ө тэныд лои гөгөрвоана? Мыйла сёрниө пыртөны кадакывъяссө?

184. Лыдды кывъяссө да орчөд юалөмъяскөд.

Дасьтө, тувъяліс, вөчисны, өшөдны, овмөдчасны.

😊😊 **185.** Лыдды. Колана ногөн вежлав скобка-ясын сетөм кадакывъяссө.

Өшинь улө ми воккөд (сувтөдны) ябыръяслы выль оланін. Со (воны) миянө важ төдсаяс – ябыръяс. Найө (корсьны) асьыныс позъяс. Кык ябыр (овмөдчыны) выль керкаө.

◆ Висьтав, мыйла ковмис вежлавны кадакывъяссө.



186. Лыдды висьтыслысь заводитчөмсö да помсö. Лöсьöд шөр юкөн да юрнимав. Гиж да визьнит кадакывъяссö.

Заводитчөм: Ывлаас шондöдiс. Челядь виччысисны лунвывса лэбачьясöс.

Пом: Витя да Коля öшöдiсны ябыр позсö кыз пу вылö.



Кадакыв.

187. Лыдды колана ногөн.

Тувсов шондi тöдö ассьыс уджсö. Гөгөр сывдiс, небзьöдiс мулысь тöвся кынсö, гөгөр пелькөдiс, мыськалiс, косьтiс. Веж корьясөн вöччöдiс пуяссö. Видз вылö быдтiс веж турун, гажöдiс мича дзоридзьясөн.

И.Титов серти

◆ Висьтав, кутшöм кадакывъяс отсөгөн гижысь петкөдлö тувсов шондiлысь уджсö.

◆ Гиж текстысь кадакывъяссö.

◆ Лöсьöд некымын сёрникузя шондi йылысь.

188. Лөсьöd
серпас да план
серти висът, юр-
нимав.

План.

1. Воис гөра-
көдза кад.

2. Картупель
град вылын удж.

3. Съолөм вы-
лын долыд.

◆ Кызди гөгөр-
воан шусьөг: Тув-
сов уджыд во чөж
вердө.



189. Артмөд кывбур да гиж. Визьнит када-
кывъяссө.

Збыльмөдiс быдөнлысь
Пармалы нюм,
Тулысыс козьналіс
Корөм да дум.

А. Некрасов (Гамса)

◆ Кызди гөгөрвоан: «Тулысыс козьналіс парма-
лы нюм»?



190. Лыдды.

Шонді качлө бура вылөдз,
Йинёнъ сөдзтө первой войт.
Керка лун боканым сылө.
Войнас сәті бара вольк.

А.Мишарина

◆ Бөрйөмөн гиж действие нимъяс.

191. Корсь кадакывъяслы паныд вежөртаса кывъяс да гиж.

Муніс – ..., восьтіс – ..., петіс – ..., өзтіс – ... ,
лэччис – ... , нуис – ..., петкөдіс – ..., сетіс –

Отсөг кывъяс: *пырис, вайис, пыртіс, кайис,
босьтіс, локтіс, кусөдіс, пөдлаліс.*

192. Лыдды да юрнимав гижөдсө.

Дундісны, лөзөдісны юяс. Со мөдөдчис йи. Йи
пластьяс тэрмасьоны, зільоны панйыны өта-мөдсө.
Сьодасьөм гөрбсө тюльгыласны гудыр ва пытшкө,
сувтласны дорышөн, люкыштасны ас дорсьыс
ичөтджык йиторъяс, поткөдасны найөс уна пельө.

Мукөддырйи крукасясны кытчөкө, ю вомөн тэчасны джуджыд пос. Но визув ваыс вочасөн төчитө найос, бара вөтлө водзө.

И.Коданёв серти

◆ Бөрйөмөн гиж йи кылалөм серпас петкөдлысь кадакывъяс.

◆ Наблюдайт йи кылалөмсө да висътав сы йылысь.



193. Лыдды. Содты лөсялана действие нимъяс да гиж.

Вочасөн (сыліс, бырис, исковтіс) лым. Керка вевтъяс вылысь (войталө, төпкө, виялө) войтва. Гудыр ваа шоръяс (бузгөны, котөртөны, тэрмасьөны, визувтөны, писькөдчөны) юлань.



Текст-мөвпалөм.

194. Лыдды. Кутшөм кывсянь заводитчө быд юалана сёрникузя?

1. Мыйла *Сыктывкар* кыв гижсьө ыджыд шыпассянь? 2. Мыйла *мазі* кывйын колө гижны чута «і»? 3. Мыйла *ёді* кыв оз позь вуджөдны өти визъысь мөдө?

◆ Вочавидз юалөмъяс вылас. Сёрникузясö пырт татшөм кывъяс: **сы вöсна, мый; сы понда.**



Буско кыв колö гижны ыджыд шыпасянь *сы вöсна, мый* тайö пемöс ним.

Буско – тайö пон ним. *Сы понда* тайö кывсö колö гижны ыджыд шыпасянь.



Юалөм вылö вочавидзигөн колö индыны помкасö. Помкасö индигөн висьталысьыс мөвпалö, гөгөрвоодö кутшөмкө мөвп. Висьталысьөн дасьтөм гижöдыс шусьö **текст-мөвпалөмөн.**



195. Лыдды гижöдсö.

Вижьюр шуöны пöлясян турунөн. Тайö турун юрас гөн кодь небыд сiясыс лэбзьöны тöвру пöлыштöмысь. Кокни сiяссö позьö пöлялөмөн лэбзьöдлыны.

◆ Вочавидз юалөм вылö: **Мыйла вижьюр шуöны пöлясян турунөн?** Юалөм вылö вочавидзигөн пырт кывъяс: **сы вöсна, мый; сы понда.**

◆ Тöдмав, мыйла вижьюрсö рочөн шуöны мать-и-мачеха.

196. Лыдды гижөдсө.

Сизь – вөр бурдөдысь лэбач.

Пармаын тшөкыда кывлө сизьлөн тотшөд-чөмыс. Мыйла тайö пемөссö шуоны вөр бурдөдысьөн?

Сизьыд буртор вөчө миянлы: видзö парма-вөртö. **Лэбач** лун-лун **сизьдö** пуö. Сийö ёсь нырнас кырсьсö пу да перйö сэтысь гаг.

◆ Кутшөм мөвп гөгөрвоодсьö текстас? Висьтав текстлысь шөр мөвпсö.

◆ Позяс-ö тайö гижөдсö шуны текст-мөвпалөмөн? Мыйла?

◆ Бөрийөмөн гиж кадакывъяс.

◆ Төдчөдөм кывъяслысь гөгөрвоод гижанногсö.

◆ Төдмав вөр бурдөдысь лэбачьяс йылысь.



197. Лыдды нөдкывсö да помав. Гиж колана шыпасъяс содталөмөн.

Вөрын кылö: тук-тук-тук!

Уджсö некод... оз дз...г.

Юрыс гөрд, а б...рдас визь.

Н...мыс л...бачыслөн

П. Образцов



Кывберд.

198. Лыдды. Тодчөдөм кывъяс дінас сувтөд юалөм.

Пөлыштис мелі лун төв. Ньюлыштис лымсө ясыд шонді. Писькөдчисны юлань **тэрыб** шоръяс. Көнсюрө мыччисис **веж** турун да **югыдвиж** дзоридз.

◆ Лыдды гижөдсө төдчөдөм кывъястөг. Мый вежсис?

◆ Шоньд, гажа, шондіа, сөстөм, тувсов, мича, ясыд, яр, мелі, шань, югыд, кельыдлөз кывъяс пыртөмөн дасьты сёрникузяяс да гиж.

Признак нимъяс вочавидзёны **кутшөм?** юалөм вылө.

Признак петкөдлысь кыв шусьö **кывбердөн.**

Мелі, ясыд, тэрыб, веж – тайö кывбердъяс.

199. Содты сетөм кывбердъяс дорö лөсялана предмет нимъяс да гиж.

Сөдз ..., авъя ..., рам ..., еджыд ..., зіль

Сөдз – югыд, мича, сөстөм.

Авъя – төлка, сусь, вежавидзысь.





200. Гиж юаломъяс местао лөсялана кывбердъяс содталомөн.

Водз садьмө мам кодь (кутшөм?) шонді. Сійө сывкнитө ассьыс (кутшөм?) югөръяссө парма пасьта. Быдлао инмө сылөн (кутшөм?) кывйыс. Ловзисны (кутшөм?) кыз пулөн (кутшөм?) коръяс.



Кывберд.

201. Лыдды нөдкывсө да төдмав.

Сизим рөма, ичөт-ичөт,
А сикт помын, көні лөс,
Өшйис мегыр кодь, зэв мича
Кйөн вөчтөм ыджыд пос.

А.Мишарина



Лөс – пөдвөлөка, йирк выв.

◆ Кутшөм кывъяс отсалісны төдмавны нөдкывсө?

202. Содты лөсялана признак нимъяс да гиж. Текстсө юрнимав.

Вөр сайсянь мыччысис ыджыд ... кымөр. Сійө сайөдіс ... шондісө. Ывлаын пемдіс. Югнитіс ...

билөн кузь бөж. Сяркнитіс ... шыён гым. Керка
вевтө мөдісны швачөдны ... зэр тусьяс. Недыр
мысти енэжын мыччысис ... өшкамөшка.


Отсөг кывъяс: **посни, ыджыд, съöd, ярьюгыд,
гөрд, мича.**

203. Лыдды кывбурсө колана ногөн. Вөч
логическөй ударение төдчөдөм кывъяс вылө.

Бара садьмис **вөр** и **ва**
Тувсов гымлөн горысь.
Өшкамөшка юө ва
Миян **визув** шорысь.

С. Попов

◆ Велөд кывбурсө да гиж юрсыд. Визьнит
вуджөдны позьтөм кывъяс.

 **204.** Юклы сёрникузяяс вылө да гиж. Визь-
нит кывбердъяссө.

Ывлаын рөмдіс енэжсө юковтіс лөзов чард
усисны чорыд зэр войтъяс ыджыд горөн ызөбтіс
көдзыд зэр валөн руд стенис сайөдіс яг регыд зэр
лөнис.

Л. Лыюров серти



? *Мыйла сёрниö колö пыртны кывбердъяс?*

205. Лыдды серпассö. Кутшöм кывъяс отсöгөн авторыс петкöдлö мулысь мичсö?

Мулөн мич.

Тайö эрд вылас гожöмыс чукöртöма ассьыс став мичлунсö. Паськыда синсö восьтöма катшасин. Дзоридз шöрас – гöгрöс виж кытш, асья шондi. Бiлiсянь тыдалö югидвиж рöма гöгрöс вижъюр. Со кузь кок йылас тшапа сулалö чай турун. Эрд пасьтала ыпъялö бобöняньлөн гöрд юрыс.

С.Раевский серти

◆ Позьö-ö гижöдсö шуны текст-серпасөн? Мыйла?

◆ Инды кывбердъяссö. Мый найö петкöдлöны?

206. Лыдды да юрнимав. Серпас серти содты колана кывбердъяс да гиж.

Грездсянь неылын шыльквидзис видз. Уна сикас рöмөн гажöдö сiйö синтö гожся кадö! Со копрасьö ... кока жыннян турун. Танi жö ... биторъясөн öзйышталö бобöнянь. Көнсюрö ... синсö лапйöдлö мылöдвуж. Гажаа довийöдлö ... юрсö катшасин.



Понтільгун, жынняян турун – жынняян кодъ лöz рöма дзоридза турун.

◆ Инды рöм петкöдлысь признак нимъяс.

◆ Кутшöм кывъяс отсöгөн гижысьыс ловзбö-дöма дзоридзьяссö?

◆ Медбөръя сёрникузяысь инды подувпассö да юөрпассö. Висътав, кыдзи йитчöмаöсь тайö сёрни-кузяас кывъясыс.

◆ Лöсьöд да гиж сёрникузя дзоридз йылысь.



207. Бөрйы лöсялана кывбердъяс да гиж. Кывъ-ясын чутъяс пыддиыс содты колана шыпас да гөгөрвоöd гижанногсö.

Воис ... видз. Гөгөр лэбал...сны ... маз...яс да корсисны дзоридзысь ... нёнялантор. Öвтіс ... төвру. Сійö вайис ... көр.

Отсöг кывъяс: **юмов, зіль, чöскыд, паськыд, небыд.**



? Мыйла сёрниö колö пыртны кывбөръяс?

208. Серпас серти вочавидз юалöмъяс вылö. Пырт колана кывбөръяс.



- ◆ Кöни пукалö ур?
- ◆ Кытчö йöжгыльтчис кöч?
- ◆ Кытчö саймовтчис мой?
- ◆ Мый улö пырис руч?
- ◆ Кытчö дзебсис визяорда?

Отсөг кывъяс: *пу вылын, коз сайö, шор дорö, кильчö улö, потшöс бокö.*



Вылын, улын, дорын, сайын, бокин кывъяс лооны кывбörъясөн. Найö сулалöны предмет ним бöрын да гижсьöны торйөн. Сёрникузяын кывъяс йитчöны öта-мöдыскöд кывбörъяс отсөгөн.



209. Бөрйы лöсялана кывбör да гиж сёрникузяяс.

Эрд ... сулалö кыз пожöм. Пу ... пуксьывлöны вотчясьяс. Пöрысь пожöм ... быдмöны том пуяс.

◆ Лöсьöд 1–2 сёрникузя пожöм йылысь да гиж.

◆ Медводдза сёрникузяысь инды сюрöса юкöдъяссö.



Кывбör.

210. Лыдды кывчукöрсö. Мый колö вöчны, медым артмис сёрникузя?

повзьöм

кöчиль

котраліс

пу

◆ Содты колана кывбör да артмöд сёрникузя.

◆ Юалöмъяс отсөгөн корсь сёрникузяын сюрöса да содтана юкöдъяс.

211. Лыдды висьтсө. Кутшөм орфограммаа кывъяс эмось текстас?

Ытва дырйи.

Гожөмнас көчиль оліс дітор вылын. Сійө узьліс куст улын. Тулыснас ваыс өдйө туис. Регыдөн муыс көтасис. Ді шөрас колис сөмын ичөтик косін. Сэні сулаліс джуджыд пу. Повзьөм көчиль чечыштіс кыз ув вылө. Мөд луннас ваыс ямис. Көчиль радлігтыр тривкнитіс му вылө.

◆ Висьтыслы сет мөд юрним.

◆ Лыдды план да инды текстысь куим юкөн.

1. Дітор - көчлөн муса оланін.
2. Тувсов кадө көчильлөн шог.
3. Пемөслөн радлун.

◆ Вочавидз гижөмөн юалөмъяс вылө. Быд юкөн гиж виль визьсянь. Визьнит кывбөръяссө.

1. Көні оліс көчиль?
2. Көні сійө узьліс?
3. Мый лоис тулыснас?
4. Кытчө кольөма косіныс?
5. Кытчө чечыштіс көчиль?
6. Мый лоис сыкөд мөд луннас?

ÖТВУЖЪЯ КЫВЪЯС



Öтвужъя кывъяс.

? *Кутшöм кывъяс шусьöны öтвужъя кывъясöн?*



212. Тайö аслысьяма пу. Пуыслöн быд вож – кыв. Лыдды кывъяссö да орчöд найöс. Инды кывъяслысь öткодьлунсö да торъялöмсö.

213. Лыдды кывъяссö.

сьылысь	гөр
сьывны	гöрысь
сьыланкыв	гөрны
сьылöм	гөрöм

◆ Мыйöн кывъясыс öткодъöсь? Гөгөрвоод кывъ-яслысь вежöртассö.

◆ Мыйöн кывъясыс торъялöны öта-мöдсьыс?

Быд пулön эм вуж. Найö вужъясьöмаöсь пыдö муас. Вужтöгыд пуыд оз быдмы-сöвмы. Сидзи жö кыв вужйысь артмöны выль кывъ-яс. **Вөр** кывйысь артмöмаöсь мукöд кывъяс: **вöравны, вöралысь, вöралöм**. Öткодъ вужъя кывъяссö шуöны **öтвужъя кывъясөн**. Öт-вужъя кывъяс матынöсь вежöртас сертиыс.

214. Артмöд öтвужъя кывъяс.

Мый?	Кутшöм?	Мый вöчны?
зэр	зэра	зэрны
би
иган
тшын
кымөр

215. Лыдды. Аддзы өтвужъя кывъяссö да гиж найöс.

Сыланкыв.

Кыдзи сылісны йöзыс! Помаласны öти сыланкыв, заводитасны мöдöс. Сылöмыс матыстö йöзöс öта-мöд дінас, вöчö мортöс сöстөмөн да небыд сьöлöмаөн. Сылысь мортлы эскан. Сывны радейтысь мортыд некор оз вöч лёктор.

П. Шахов серти



216. Корсь өтвужъя кывъяс да гиж öти визьö. Висьтав, мыйөн öткодьöсь да мыйөн торъялöны найö öта-мöдсьыс.

Гижöд, тöвйыны, лунтыр, лэбач, гижысь, тöv, лунся, лэбөм, лун, тövся, гижöм, лэбны.



Удж, уджач, уджавны.



Кыввуж – кывлөн медшөр юкөн.



? *Кутшöм öткодь юкөн эм кывъяслөн?*

217. Лыдды кывъяссö да корсь öткодь юкөн.

Удж, уджалысь, уджач, уджалö.

Эж, эжа, эжны, эжöм, эжöд, эжмöм.

Кывъяслөн өткөдъ юкөн шусьö кыввужйөн:
удж, эж.

87

Кыввуж – кывлөн медшөр юкөн.

Кыввуж петкөдлө кывйыслысь медтөдчана
вежөртассö.

Кыввужсö петкөдлөны тадзи: 

? *Кызди колö корсьны кывйысь кыввужсö?*

Уськөд төд вылад!

Медым аддзыны кыввужсö, колö:

◆ бөрйыны өтвужъя кывъяс: *удж, уджавны, уджач;*

◆ орчөдны найос вежөртас да тэчасног серти;


◆ корсьны өтвужъя кывъяслысь медшөр юкөнсö да пасйыны.


218. Сетөм кывъясысь артмөд **мый вöчны?**
юалөм вылө вочавидзысь кывъяс да гиж. Кывъяс-
лысь петкөдлы кыввужсö.

Иган – ..., пас – ..., шебрас – ..., кытш – ...,
озыр – ..., скөр – ..., шоныд –



Шы – шыасьны.

 **219.** Гиж вотös кивлы öтвужъя кивъяс да пасйы киввужсö. Артмöm кивъясөн «Вотчöm» тема серти лöсьöd нейджыд висът.

 **220.** Артмöd кутшöm? юалöm вылö вочавидзысь öтвужъя кивъяс. Бөрйы лöсялана кыв, лöсьöd кивтэчас да гиж.

Гаж, гы, зэр, турун, тшак, чери, шуд.

 **Вын – вына трактор.**

221. Лыдды.

Со и помасис велöдчан во. Во чöж ми велöдчим школаын, босътим уна тöдöмлун тэ йылысь, чужан кыв. Велалим колана ногөн сёрнитны да гижны чужан кывйөн. Шойччыштöm бöрын ми водзö мöдам велöдны тэнö, муса коми кыв.

◆ Кызди тэ гөгөрвоан: *Велалим колана ногөн сёрнитны да гижны чужан кывйөн?* Позьö-ö тадзи шуны тэ йылысь?

◆ Кывлөн кутшöm гусяторъясөн тöдмöдiс тэнö Грамматик пöль?

◆ Висьтав, мыйö тэ велалин во чöжнас коми кыв урокъяс вылын.

Дона челядь!

Чолөмала тiянөс велөдчан во помасьөмөн! Мөд классын тi унатор төдмалiнныд коми кыв йылысь. Гожөмнас бура шойччөй, содтөй вын-эбөстө.

**Аддзысьлытөдз
коймөд классын!**

Грамматик пөль



ВЕЛӨДЧЫСЬЛЫ ОТСӨГ ВЫЛӨ

1 индөд

Анбур.

А а	Б б	В в	Г г	Д д	Дж дж	Дз дз	Е е
а	бө	вө	гө	дө	джө	дзө	е
Ё ё	Ж ж	З з	И и	і	Й й	К к	Л л
ё	жө	зө	и	чута і	йө	кө	лө
М м	И н	О о	Ө ө	П п	Р р	С с	Т т
мө	нө	о	ө	пө	рө	сө	тө
Тш тш	У у	Ф ф	Х х	Ц ц	Ч ч	Ш ш	
тшө	у	фө	хө	цө	чө	шө	
Щ щ	ъ	Ы ы	ь	Э э	Ю ю	Я я	
щө	чорыд пас	ы	небыд пас	э	ю	я	

2 индөд

Велөдчы видзөдөмөн гижны.

1. Лыдды (шу) кывсө слогөн.
2. Төдмав кывйыслысь вежөртассө.
3. Гиж кывсө слогъясөн шуалөмөн.
4. Лыдды тетрадын гижөм кывсө да небө-гын печатайтөмсө, өткодяв найөс.

3 индöd

Велödчы дасътысьны кывзöмөн гижöм кезлö.

1. Лыдды гижöдсö.
2. Тöдмав кывъясылысь вежöртассö.
3. Лыдды быд кыв да инды орфограмма-яссö.
4. Уськöд тöд вылö правилöсö да гөгөрвоöd кывъясылысь гижанногсö.

4 индöd

Велödчы гижны юрвежысь.

1. Лыдды текстсö да тöдмав кывъясылысь вежöртассö.
2. Инды орфограммаа кывъяссö, кöни гижигөн верман торксьыны.
3. Велöd текстсö наизусът.
4. Лыдды текстсö небöг серти.
5. Босът тöд вылö пунктуация пасъяс.
6. Небөгö видзöдтөг гиж текстсö.
7. Лыдды тетрадын гижöмсö да небöгын печатайтöмсö, öткодяв найöс да инды тырмытöмторъяссö.

5 индöd

Шы да шыпас серти кыв видлалöм.

1. Лыдды (шу) кывсö.
2. Юклы кывсö слогъяс вылö, инды слог лыдсö.
3. Гиж кывсö шыяс серти (транскрипцияөн).
4. Сьöрсьөн-бöрсьөн торйöd быд шы да висътав на йылысь:

1) Гласнöй шы, гижигөн кутшöм шыпасөн пасйыссьö.

2) Согласнöй шы: чорыд либö небыд, гора либö гортöм; гижигөн кутшöм шыпасөн пасйыссьö.

5. Шу кывсö да инды шы лыдсö.

6. Гиж кывсö да инды шыпас лыдсö.

1. Гижтöм сёрни.

Каньпи кывйын 2 слог. Воддза слогас [к] шы – согласнöй, чорыд, гортöм; пасйыссьö «кö» шыпасөн; [а] – гласнöй, пасйыссьö «а» шыпасөн; [н'] – согласнöй, небыд, гора; гижигөн пасйыссьö «нö» шыпасөн да «небыд пасөн». Мöd слогас [п] шы – согласнöй, чорыд, гортöм; пасйыссьö «пö» шыпасөн; [и] – гласнöй, пасйыссьö «и» шыпасөн. **Каньпи [кан'пи]** кывйын 5 шы, 6 шыпас.

2. Гижöда сёрни.

Каньпи – кань-пи [кан'пи], 2 слог.

к – [к] – согласнöй, чорыд, гортöм

а – [а] – гласнöй

н – [н'] – согласнöй, небыд, гора

ь – –

п – [п] – согласнöй, чорыд, гортöм

и – [и] – гласнöй

6 шыпас 5 шы

ВЕЖӨРТАС ГӨГӨРВОӨДАН КЫВКУД

Авъя – төлка, сюсь, вежавидзысь

Азыма – горша, чөсмасьөмпырысь

Гулыд яг – гежөд пуяса, абу сук вөр

Гыр – ид да мукөд сикас тусь чирслан-посньөдлан
да пызь вөчан кыддзысь вөчөм доз

Дзирыд – югъялысь, дзирдалысь

Дундісны юяс – паськалісны, ойдісны юяс

Жодза – шоммысь либө шоммөм нин (йөв)

Зарава – тулысын кыддзысь виялан ва; кыз пу
ва

Зөридз – васөдінын, ты доръясын быдмысь ту-
рун

Йир – ю пыдөсын джуджыд гуран

Катшашыдөс – шыдөс кодь посни лым

Көдж – юлөн, шорлөн крут чукыль

Кельөб – пөткаяслөн ёсь нырөн лэбысь чукөр

Коляоз – лыска пуяслөн дзоридз, оз кодь гөрд

Лөс – пөдвөлөка, йирк выв

Ловпу – васөдінын быдмысь коръя пу (ольха)

Лэбув – сюръяяс вылын вевта восьсаин, турун
либө пес видзанін

Неминуча – шог, лёктор

Нёрпавны – висьөдчыны

Нур – этшаник сёян

Нюдз – куснясьысь, нюклясьысь (пу)

Оржы – шылъыд коръяса, исерга нога дзоридза,
веськыд пучера джуджыда быдмысь пу (тополь)

Пакӧсьт – лектор

Пӧлян – тӧщӧ заа турунысь либӧ гумйысь вӧчӧм
пӧлялӧмӧн ворсантор

Пелыськай – пышкай рӧдысь вӧрса ичӧт лӧбач
(дрозд-рябинник)

Понтільгун, жынняян турун – жынняян кодъ лӧз
рӧма дзоридза турун

Пыллыны – чирйыны, кышйыны, весавны, кол-
лысь кӧйдыссӧ весавны

Сам – чери либӧ лӧбачӧс кыйигӧн вугырӧ либӧ
лӧчкӧ пуктӧм ылӧг

Сӧдз – югыд, мича, сӧстӧм

Тюрик – сунис трубича

Харей – доддялӧм кӧръясӧн веськӧдлан кузь бедь

Чибльӧг – сямӧдысь гартыштӧм, беддьӧ пысалӧм
шорысь либӧ юысь ва юан доз

Шер – йиа зэр

Шляка – ва лым

СЁРНИ

Сёрни. Өтка да морта-морт сёрни	5
Гижода да гижтом сёрни	6

КЫВ, СЁРНИКУЗЯ ДА ТЕКСТ

Кыв, сёрникузя да сёрни	8
Сёрникузя.....	10
Текст. Текстлөн тема. Юрним	12
Текстлөн шөр мөвп. Текстлөн тэчас.....	14

КЫВТЭЧАС ДА СЁРНИКУЗЯ

Кывтэчас. Сёрникузя	17
Юортана, юалана да чуксалана сёрникузяяс	19
Сёрникузя сикасъяс.....	21
Горөдана да абу горөдана сёрникузяяс	23
Подувпас.....	25
Юөрпас.....	26
Сёрникузяын сюрөса да содтана юкөдъяс.....	28

ШЫ ДА ШЫПАС

Шы да шыпас.....	31
Анбур.....	33
Гласной шыяс да шыпасъяс.....	35
Согласной шыяс да шыпасъяс. Гора да гортөм согласной шыяс	37
Слог.....	39
Кывъяс визьысь визьö вуджөдөм	41

Кывъяс визъысь визьö вуджödöм	43
Параа чорыд да небыд согласнöйяс.....	45
Небыд пас (Ь) кыв помын	47
Небыд пас (Ь) кыв шöрын.....	49
Небыд пас (Ь) кыв помын да шöрын	50
Небыд паса кывъяс визъысь визьö вуджödöм	53
Небыд пас (Ь) кыв помын да кыв шöрын.....	54
Е, Ё, Ю, Я – йота гласнöйяс	56
Согласнöйяс бöрын А да Я шыпасъяс гижöм	58
Согласнöйяс бöрын А да Я шыпасъяс гижöм	60
Согласнöйяс бöрын У да Ю шыпасъяс гижöм	61
Согласнöйяс бöрын У да Ю шыпасъяс гижöм	63
Согласнöйяс бöрын О да Ё шыпасъяс гижöм	64
Согласнöйяс бöрын Э да Е шыпасъяс гижöм	65
Согласнöйяс бöрын Э да Е шыпасъяс гижöм	67
Согласнöйяс бöрын И да Ё шыпасъяс гижöм	69
Согласнöйяс бöрын И да Ё шыпасъяс гижöм	70
Дз [z'] шыа кывъяс.....	72
Дж [z] шыа кывъяс.....	75
Тш [ч] шыа кывъяс.....	78
Дз [z'], Дж [z], Тш [ч] шыаса кывъяс визъысь визьö вуджödöм	79

КЫВСИКАСЪЯС

Предмет, действие да признак нимъяс.....	81
Эмакыв.....	83
Эмакывлön лыд. Ъ да Ъ торйöдан пасъяс.....	85
Торйöдан Ъ да Ъ паса кывъяс визъысь визьö вуджödöм	88

Морт нимъясын, овъясын да вичъясын ыджыд шыпас	90
Йöзкостса ним-вичъяс	92
Пемöс нимъясын ыджыд шыпас	93
Кар, сикт, грезд, ю нимъясын ыджыд шыпас	95
Кар, сикт, грезд, ю нимъясын ыджыд шыпас	97
Кадакыв	98
Кадакыв	100
Кадакыв	102
Текст-мöвпалöм	103
Кывберд	106
Кывберд	107
Кывберд	109
Кывбөр	111
Кывбөр	112

ÖТВУЖЪЯ КИВЪЯС

Öтвужъя кивъяс.....	114
Кыввуж – кивлөн медшөр юкөн	116

ВЕЛÖДЧИСЪЛЫ ÖТСÖГ ВИЛÖ

1 индöd. Анбур.....	120
2 индöd. Велödчы видзödмөн гижны	120
3 индöd. Велödчы дасътысьны кывзömөн гижöm кежлö	121
4 индöd. Велödчы гижны юрвежысь	121
5 индöd. Шы да шыпас серти кив видлалöm	122
Вежöртас гөгөрвоодан кивкуд	123

Полякова Э.И.

П 54 Коми кыв: Мӧд класслы велӧдчан небӧг. –
Сыктывкар: ООО «Анбур», 2009. – 128 л.б.

ISBN 978-5-91669-021-7

81.2 Коми-9

Рекомендовано
Министерством образования Республики Коми

Учебное издание

ПОЛЯКОВА ЭЛЬВИРА ИВАНОВНА

КОМИ ЯЗЫК

Учебник для 2 класса

На коми языке

Художники: Г. Н. Шарипков, И. А. Авилова

Редактор В. И. Трошева
Компьютерная верстка - С. И. Оверин

Подписано к печати 01.10.09. Формат 70х90^{1/16}. Бумага офсетная.

Печать офсетная. Усл. печ. л. 9,36. Уч.-изд.л. 8,0

Тираж 700. Заказ №4848

ООО «Анбур». 167982, г.Сыктывкар, ул.К.Маркса, 229

Отпечатано с готового оригинал-макета в полном соответствии с качеством
предоставленных материалов в ООО «Коми республиканская типография»
167982, г.Сыктывкар, ул.В.Савина, 81

ISBN 978-5-91669-021-7



9 785916 690217



ДЖ ДЗ ТШ
[Z] [Z'] [Ч]

[Ш]

ПАРАА
ГОРА ГОРТӨМ

[Б]	[П]
[Г]	[К]
[Д]	[Т]
[Д']	[Т']
[З]	[С]
[З']	[С']
[Ж]	[Ш]
[Z]	[Ч]
[Z']	[Ч']

ПАРАТО
[В] [Л] [Л'] [М] [Н] [Н'] [Р]

СОГЛАСНӨЙЯС





Щ
[шш] [ч]

КОМИ РОЧ
П Ф
К Х
Ч Ц

Ь Ъ

ОМ
[й']
[х] [ц] [ч'] [ф]

ГЛАСНОÿ
ШЫ ШЫПАС
[а] а-я
[о] о-ё
[у] у-ю
[э] э-е
[и] і-и
[ө] ө
[ы] ы

ГЛАСНОÿЯС

АНБУА

